

四庫全書

經部

欽定四庫全書

經部

禹貢錐指卷十四下

詳校官監察御史臣王爾烈

通政使司副使臣莫瞻菴覆勘

總校官庶吉士臣倉聖脉

校對官檢討臣盧應

謄錄監生臣徐壇

欽定四庫全書

禹貢錐指卷十四下

德清胡渭撰

岷山導江東別爲沱

林氏曰自江水注出別爲支流者皆名爲沱梁荆二
州皆有之也渭按岷山詳見導山荀子云江出汶山
其始發源可以濫觴地理志云禹貢嶧山在蜀郡前
氏道西徼外江水所出沱謂梁之郫江荆之夷水也

詳見梁荆二州東別爲沱者謂江水東流而別爲沱
以大勢言之江自梁而荆皆東也傳云江東南流沱
東行非是

正義云以上云浮于江沱潛漢其次自南而北江
在沱南知江東南流而沱東行是專以荆州之沱
釋傳也蔡傳云沱江之別流于梁者則又遺却荆
州之沱東至于澧相去不太闊絕乎唯林氏兼二
州言之確不可易

水經注岷山在蜀郡氐道縣大江所出江水自天

彭闕東逕汶關而歷氐道縣北

漢武帝分蜀郡北
部置汶山郡以統

之縣本秦始皇置後爲昇遷縣也按氐道即前氐
道蜀漢曰氐道晉改名升遷今四川松潘衛治是

也又逕汶江道汶水注之

水出徽外崕山西玉輪
坂下而南行又東逕其

縣而東注于大江又東別爲沱開明之所鑿也郭
景純所謂玉壘作東別之標者也按汶水亦名玉
輪江方輿勝覽云在汶川縣北三里玉壘山元和
志云在汶川縣東北四里也縣北去茂州百里本
漢緜虢縣地今爲保縣江沱自古有之華陽國志
曰七國時杜宇稱帝于蜀號望帝其相開明決玉
壘山以除水害帝遂禪位于開明此說出揚雄蜀
王本紀故漢志云汶江縣有江沱在西南東入江

夫既爲七國時開明所鑿則非禹貢之江沱亦不待辨而自明矣

又有湔水入焉

水出縣虎縣之玉壘山吕忱云一曰半浣水也下注江

益州記曰

此記蓋任豫所作

大江泉源即今所聞始發羊膊嶺下緣崖散漫小

大百數殆未濫觴矣東南下百餘里至白馬嶺而

歷天彭闕亦謂之天谷

秦昭王以李冰爲蜀守冰見氐道縣有天彭山兩山

相對其形如闕謂之天彭門亦曰天彭闕江水自此已上至微弱所謂發源濫觴者也漢元延中岷山崩壅江水三日不流按通典彭州導江縣西有天彭闕兩山相對如闕州名取此導江即今灌縣西北去松潘六百餘里非益州記之所謂天彭闕也

自白馬嶺回行二十餘

里至龍涸

升遷縣後魏時陷于吐谷渾周天和元年改置龍涸郡嘉誠縣龍涸亦曰龍鶴

華陽國志云蜀時以汶山險要自汶江龍鶴再驪白馬匡明皆置戍守元和志雪山在松州嘉誠縣

東八十里春夏常有積雪甘松嶺在縣西南十五里龍涸故城俗名防渾城在翼州衛山縣北十一

里城之北境舊爲土谷渾所居故曰防渾笮橋在縣北三十七里架北江水又八十里

至西陵縣

未詳又南下六十里至石鏡元和志翼水縣北至翼州

六十里石鏡山在縣東南九里大江水經縣西二百步又六十餘里而至北

部始百餘步

沒江瀉蜀郡北部都尉治故謂之北部又西百二十餘

里至沒山故郡乃廣二百餘步

漢元鼎六年以冉驪地置沒山郡治

沒江縣地節三年郡廢縣屬蜀郡建安中先主定蜀復分置汶山郡治汶江縣今茂州是也其故城在州北三里晉移郡于緜鹿縣界改汶江曰廣陽屬焉在今州南二百里故謂漢所置曰汶山故郡即宣帝廢爲蜀郡北部者也隋改廣陽曰汶山縣復置汶山郡元和志云有汶山即岷山去青城百

里又西南百八十里至濕坂江稍大矣

河圖括地象岷山之

精上爲井絡帝以會昌神以建福故書曰岷山導江泉流深遠盛爲四瀆之首按元和志濕坂在茂州汶川縣南一百三十七里嶺上樹木森沈常有水滴未嘗暫燥故曰濕坂自大江泉源至江稍大矣皆益江水又歷都安縣李冰作大堰於江作壩州記語壩有左右口謂之湔壩江入郫江檢江以行舟益州記曰因山頽水坐致竹木蜀人旱則藉以爲溉雨則不遏其流故記曰

水旱從人不知饑饉沃野千里世號陸海謂之天府也俗稱都安之堰亦曰湔堰又曰金隄左思蜀都賦云西踰金隄者也諸葛亮北征以此堰農本國之所資以征丁千二百人主護之有堰官按都安本漢縣虎耶江原三縣也蜀漢分置都安縣屬汝山郡唐改曰導江屬成都府明爲灌縣都安故城在縣東都安堰在縣西華陽國志曰李冰壅江作壩穿耶江檢江別支流雙過郡下以行舟船蓋以耶檢爲二江檢江即任豫之所謂流江也又有捷尾堰元和志云在導江縣西南二十五里李冰作之以防江決破竹爲籠圓徑三尺長十丈以石實中累而壅水

又逕臨邛縣屬蜀郡今邛州是又逕江原縣鄴江水出焉

江原今爲崇慶州漢志江原縣鄴水首受江南至武陽入江武陽今眉州及新津仁壽井研三縣地也

江水又東北

逕郫縣下

元和志故郫城在縣北五十步

又東逕成都縣

縣有二江雙流

郡下故揚子雲蜀都賦曰兩江珥其前也風俗通曰秦昭王使李冰為蜀守開成都兩江溉田萬頃

按成都故城即今縣治蜀王開明故都也秦置成都縣舊有大城少城羅城羊馬城又東逕

廣都縣

江北則左對繁田文翁又穿前洩以溉灌繁田一千七百頃其水又東經縣洛逕五

城界至廣都北岸南入于江謂之五城水口斯為北江水又東至南安為碧玉津故左思云東越玉

津也按漢蜀郡有廣都縣其故城在今成都縣東南新津縣東北繁田繁縣之田今為新繁也又

東南過犍為武陽縣與鄆江合青衣水沫水從西

南來合而注之

縣故大夜郎國漢武帝開道置以為縣有鄆江入焉出江原縣首受

大江東南流至武陽縣注于江江水自武陽東至彭士聚曰外水又東南逕南安縣西有熊耳峽連山競險接嶺爭高有灘名壘抵鹽溉李冰所平也縣治青衣江會衿帶二水即蜀王開明故治縣南有峨眉山有濛水即大渡水發蒙溪東南流與泔水合又東入江按犍爲郡有南安縣今嘉定州及夾江犍爲洪雅等縣皆其地武陽已見前

又東南過犍道縣北若水滄

水合從西來注之

武帝感相如之言使縣令南通犍道費功無成唐蒙南入斬之

乃鑿石開閣以通南中迄于建寧二千餘里山道廣丈餘深三四丈其鑿之跡猶存縣江中崖峻岨險不可穿鑿李冰乃積薪燒之故其處巖猶有赤白玄黃五色焉按犍道屬犍爲郡今爲宜賓縣叙州府治若水出蜀郡旄牛徼外東南流至越巂會無縣合淹水又東北至朱提縣西爲瀘江水又

東北至颯道縣

又與符黑水合

水出寧州南廣郡南廣縣導源汾關

山北流逕颯道入江按故符縣在今叙州府合江縣西

又東過江陽縣南洛

水從三危山東過廣魏洛縣南東南注之

洛水出洛縣章

山南逕洛縣故城南又南逕新都縣與縣水湔水合亦謂之郫江也又逕犍爲合牛鞞水又東逕資

中縣安漢縣謂之緜水以上諸縣咸以溉灌故語曰緜洛爲浸沃也緜水至江陽縣方山下入江謂

之緜水口曰中江江陽縣枕帶雙流據江洛會也按江陽屬犍爲郡今敘州府富順縣及瀘州納溪

江安皆其地漢志廣漢郡雒縣章山雒水所出南至新都北入湔縣竹縣紫巖山緜水所出東南

都北入雒縣洛會湔以湔爲主故縣虎縣下云前水東南至江陽入江過郡三行千八百九十里也

酈注言湔水至廣都北岸入江蓋特其枝津相通耳正流則固合絲洛至江陽入江也湔水與郫江通波故曰絲洛與湔又逕安漢縣北江陽郡治也故犍為岐江水合亦謂之郫江

都尉建安十八年劉璋立又東逕樊石灘大附灘頻歷險又東過

符縣北又東北至巴郡江州縣東强水涪水漢水

白水宕渠水五水合南流注之强水即羌水也宕渠水即潛水渝水

矣巴水出晉昌郡宣漢縣巴嶺山西南流歷巴中逕巴郡故城南西南入江庾仲雍所謂江州縣對二水口左則涪內水右則蜀外水即是水也江州故巴子都秦置巴郡按江州今為巴縣江津綦江二縣亦其地漢志廣漢郡剛氏道涪水出徼外南至墊江入漢墊江今合州也漢水即嘉陵水巴水

一名北水其下流爲宕渠水酈注云即潛水此宕渠之潛非漢壽之潛也詳見梁州又東至

枳縣西延江從牂柯郡北流西屈注之東逕陽關巴子梁江

之兩岸猶有梁處巴之三關斯爲一也江水又東右逕黃葛峽又左逕明月峽東至黎鄉歷雞鳴峽

江之南岸有枳縣治董陽記曰在巴郡東四百里治涪陵水會庾仲雍所謂有別江出武陵者也水

乃延江之枝津北注逕涪陵入江故亦云涪陵水也江水又東逕涪陵故郡北安陽關在今巴縣東

漢枳縣屬巴郡今重慶之涪州及長壽鄆都二縣皆其地涪陵亦屬巴郡今黔州彭水武隆三縣是

也又逕東望峽東歷平都華陽記曰巴子雖都江州又治平都即此按後

漢析枳縣地置平都縣今鄆都是也又逕虎鬚灘灘水廣大夏斷行旅接今忠州西二

里有石梁亘三十餘丈橫截江
中俗呼倒鬚灘即此虎鬚灘也
又東逕臨江縣南

華陽記曰縣在枳東四百里東接胸忍縣
按漢臨江屬巴郡今馮忠州及墊江縣
又東得

華水口左逕石城南
庾仲雍曰臨江至石城黃華口一百里
又東至平洲

洲上多
又東逕界壇
是地巴東之西界蓋州之東境故得是名
又東右

得龜谿口
華陽記曰胸忍縣靈龜出此谿
又東會南北集渠
二谿水出

涪陵
又東逕羊腸虎臂灘
楊亮為益州至此舟覆懲其波瀾蜀人至今猶

名之焉
使君灘
又東彭水注之
水出巴渠犂獠中東南流逕胸忍縣西六十里南流

注于江謂
之彭溪口
又東逕胸忍縣故城南
常璩曰縣在巴東郡西二百九

十里按漢胸忍屬巴郡胸音幼今雲陽萬縣是也

又東逕瞿巫灘即下瞿灘也又

謂之博望灘又東逕陽灘江上有破石故亦謂之破石灘

又東逕魚腹

縣之故陵

江側有六大陵庾仲雍曰楚都丹陽所葬也按漢魚復屬巴郡今爲奉節縣楚

故陵在縣西又東逕南鄉峽又東逕永安宮南劉備

終于此諸葛亮受遺處也其間平地可二十里許江山迴闊入峽所無按永安宮城即今奉節縣治

又東逕諸葛亮圖壘南今奉節縣南有八陳圖磧又東南逕赤

岬西赤岬一作赤甲山在奉節縣東十五里又東逕魚復縣故城南

故魚國地理志江關都尉治也巴東郡治白帝山城西南臨大江關之眩目江中有孤石爲滄預石

冬出水二十餘丈夏則沒亦有裁出矣縣有夷谿即偃山清江也經所謂夷水出焉按魚復故城今

奉節縣北三里赤甲城是也白帝山在縣東元和志云即州城所據與赤甲山相接又東逕

廣谿峽斯乃三峽之首也其間三十里頽巖倚木厥勢殆交北岸有白鹽崖高可千餘丈峽

中有瞿唐黃龍二灘夏水迴復沿泝所忌蓋自昔禹鑿以通江郭景純所謂巴東之峽夏后疏鑿者

按白鹽山在奉節縣東隔江又東出江關入南郡

十里又東有黃龍灘虎鬚灘又東逕弱關捍關廩君浮夷水所置也弱

界又東逕弱關捍關捍關廩君浮夷水所置也弱關在建平秭歸界昔巴楚數相攻伐藉險置關

以相防捍秦兼天下置南郡自巫山皆其域也按後漢岑彭傳注江關舊在赤甲城後移在江南岸對白帝城在今魚復縣南秭歸今又東逕巫縣南歸州是也捍關在今長陽縣南

鹽水從縣東南流注之又東烏飛水注之又東逕

巫縣故城南

縣故楚巫郡秦省郡立縣以隸南郡綠山爲塘南臨大江故謂之夔國按

巫縣故城在今夔州府巫山縣東北寰宇記云晉移今治在夔州東南七十二里

又東逕

巫峽

杜宇所鑿以通江水也郭仲產云按地理志巫山在縣西南而今縣東有巫山將郡縣居

治無恒故也

又東逕新崩灘

此山漢和帝永元十三年崩晉太元二年又崩當崩

之日水逆流百餘里湧起數十丈其下十餘里有大巫山首尾一百七十里謂之巫峽自三峽七百里中兩岸連山略無闕處非亭午夜分不見曦月至子夏水襄陵沿泝阻絕王命急宣有時朝發白帝暮到江陵其間千二百里雖乘奔御風不以疾也

又東逕石門灘

今巴東縣東北

有石門山又東逕秭歸縣南又東逕其城北城北對丹陽城南枕

大江楚子熊繹始封丹陽之所都也按今又東南歸州治即秭歸故城其丹陽城在州東

逕夔城南熊摯始治巫城後疾移此今在歸州東南又東逕歸鄉故城

北城在歸州東南又東逕信陵縣南今歸州東有信陵廢縣又

東逕夷陵縣南江水自建平至空冷峽即宜都建平二郡界也按夷陵漢南郡都尉

治空冷峽在歸州東南三十里又東逕宜昌縣之流頭灘其水並峻激奔

瀑魚鼈所不能游行者常苦之袁崧曰自蜀至此五千餘里下水五日上水百日也按流頭灘在今

夷陵州界又東逕宜昌縣北分夷道假山所立也縣治北枕大江與夷陵對界今

夷陵州西有宜昌故城

又東逕狼尾灘而歷人灘

二灘相去二里人灘

水至峻峭又東逕黃牛山

下有灘名曰黃牛灘南岸重巒疊起最外高崖間有石如

人負刀牽牛人黑牛黃成就分明雖途經信宿猶望見此物故行者謠曰朝發黃牛暮宿黃牛言水

路紆深迴望如一矣

又東逕西陵峽

宜都記曰自黃牛灘東入

西陵界至峽口一百許里兩岸高山疊嶂非日中夜半不見日月絕壁或千餘丈所謂三峽此其一

也今在夷陵州西北二十里

歷禹斷江

南峽北有北谷村兩山間有水清深潭而不流

者老傳言昔是大江及禹治水此江小不足瀉水禹更開今峽口水勢并衝此江遂絕于今謂之斷

江也今夷陵州西南有斷江山

出峽東南流逕故城洲

洲附北岸上有步闌

故城吳西陵督步闕所築也今爲夷陵州治又東逕故城北所謂陸抗城也今在

夷陵州東南大江南岸又東逕白鹿巖又東歷荆門虎牙之

間荆門在南虎牙在北此二山楚之西塞也水勢急峻故郭景純江賦曰虎牙桀豎以屹率荆門

闕竦而盤薄圓淵九迴以懸騰溢流雷响而電激者也按夷陵新志云虎牙山在州東南五十里磯

石大小蹲踞隱見正如虎牙戟列舟人望而避之乃由荆門而上是虎牙更險于荆門也又東

南過夷道縣北夷水從佷山縣南東北注之漢武伐西

南夷路由此出故曰夷道其故城在今宜都縣西佷山故城在今長楊縣西夷水詳見梁州此

禹岷山導江東別爲沱之所經也以今輿地言之

江水出四川松潘衛徼外岷山流逕衛北

衛本禹貢梁州

之域後為氏羌地漢置湍氏道屬蜀郡唐為嘉誠縣松州治明置松潘衛屬四川都司在成都城西

北七百六十里元和志江源鎮在松州交川縣西北三十里

又東南逕疊溪營

西營在茂州西北一百二十里本漢蜀郡蠶陵縣唐為翼州元和志大江經翼州城西又經翼水

縣西二百步按廢翼州在營西翼水廢縣在營南又東南逕茂州西茂州在成

都府西北四百十五里本漢汶江縣後周改曰汶山縣唐為茂州治元和志汶江北自翼州流經汶

山縣西又西南逕威州西玉輪江注之威州在府西北四百

五十里本漢廣柔縣唐為薛城縣維州治其故城在今州北高碕山上亦曰姜維城州西北有滴博

嶺玉輪江
即汶水

又西南逕保縣西

保縣在茂州西南四十里本漢緜虎縣後

周馮汶川縣江源記岷江南入溢村逕石紐至汶川轉銀嶺合草坡河至蠶崖入灌口括地志石紐

山在汶川縣西七十三里

又東南逕灌縣西沱水出焉

灌縣在成都府

西自北一百五十二里唐馮導江縣元和志大江自茂州界流入逕青城縣北二里寰宇記大阜

江自灌口流經青城縣北入溫江縣界青城廢縣在今灌縣西南玉壘山在縣西北離堆在縣西南

或曰即灌口山宋河渠志阜江支流迤北曰都江口置大堰疏北流爲三東曰外應口溉導江新繁

新都達于金堂東北曰三石洞口溉導江崇寧九隴濛陽達于漢之洛東南曰馬騎口溉導江崇寧

郫溫江成都華陽灌縣舊志大江經縣西三十三里分爲二派其一東南經崇慶州至新津者今謂

之南江其一東循灌城者今謂之北江北江又分
爲三派其一東南逕溫江過府城南入新津合大
江者爲流江其一自縣寶瓶口直東入五斗口東
北經郫新繁過府城北折而南合流江者謂之郫
江其一自寶瓶口東北穿三柏洞又東北經新繁
新都至漢州入雒者爲湔水參考諸說大阜江即
郫水寶瓶江之正流有元和寰宇九域等書可證
郫江即禹貢梁州之沱流江乃李冰之所穿與郫
江爲二江者郫江號北江唯東合湔雒又東南至
江陽入江者爲禹貢之江沱餘皆後人所穿鑿或
以郫江創自李冰且指流江爲江水又東南逕溫
岷江之正道大誤詳見梁州

江縣西崇慶州東

溫江在府西少南五十里本漢
郫江原二縣地元和志大江俗

謂之溫江南流經縣西一里寰宇記郫江一名阜
里水自青城縣南流經溫江縣入江原縣界成都

新志云大阜江本岷江正流自離堆鑿後乃以流江爲正流而以此爲南江崇慶在府西南九十里

本漢江又東南逕新津縣東北流江注之新津在原縣也崇慶州東南七十里

里本漢武陽縣地又東南逕眉州東眉州本漢武陽縣元和志大江亦名導江

在彭山縣東七里又經通義青神二縣東皆去縣三里今州北有武陽故城隋改武陽曰通義唐爲

眉州治彭山故城在州北青神故城在州南本朝康熙六年併入又南逕嘉定州

東嘉定本漢南安縣地後周分置平羌縣隋改曰青衣又改曰龍游爲嘉州治寰宇記導江水在

平羌縣西二十步又云大江自平羌流入龍游縣界按平羌即今峨眉縣在州西六十里又東

南逕犍爲縣北犍爲縣在州東南一百二十里亦漢南安縣地寰宇記導江水在玉

津縣西五里又在健瀉縣東二十步又東南逕宜
按玉津唐屬嘉州其廢址在今縣北

賓縣東北合馬湖江

宜賓瀉叙州府治本漢犍道縣健瀉郡治元和志汶江流

逕犍道縣東北去縣十步馬湖成在縣西二十一
里按馬湖江在縣南門外即若水下流亦曰瀘水

自馬湖府東北流入至城西南又東南逕南溪縣
一里瀉蠻津口又東合于大江

南南溪在府東南一百二十里本漢犍道縣地又東逕江安縣北江安在瀘

州西南本漢江陽縣地又東逕納溪縣北納溪在州西南四十里亦漢江陽縣

地又東北逕瀘州東南沱水合前雒諸水從西北

來注之瀘州本漢江陽縣今州治即其故城隋改
縣曰瀘川唐瀘州治華陽國志江陽江

中有大闕小闕季春黃龍堆沒闕即平元和志汶
江水經瀘川縣南三十步寰宇記謂之瀘江按雒

江在州北亦曰前水亦曰緜水互受通稱漢志云
湍水出玉壘山東南至江陽入江水經注云雒水

與緜水合又與湍水合亦
謂之郫江郫江即沱水也
沱水自灌縣西南首受

大江東逕郫縣北

郫縣在成都府西四十五里漢
志蜀郡郫縣禹貢江沱在東

入大江元和志郫江一名成
都江經郫縣北三十一里

又東逕新繁縣南
新繁

在府西北五十六里本漢繁縣括地志縣有繁江
首受郫江即禹貢江沱也元和志郫江在新繁縣

南十一里九域志新繁有
都江即所謂成都江也

又東逕成都縣北
漢舊

郡治今爲四川布政司成都府治水經注成都直
西門曰郫江北折左對繁田括地志郫江一名成

都江一名市橋江一名永平江亦曰中江亦曰內江西北自新繁界來 又東逕新都

縣南新都在府北五里漢舊縣 又東逕金堂縣南金堂在府北七十里

里本漢新都牛鞞二縣地郫江至縣東南合湔水亦曰五城水酈道元云湔水東絕緜離逕五城界

至廣都北岸南入于江謂之五城水口此涪水枝津自五城縣界西合湔郡又西至成都城東南入

流江也 又東南逕簡州北簡州在府東一百五十里本漢牛鞞縣 又東

南逕資陽縣西資陽在州東南六十里本漢資中縣地 又南逕資縣

西資縣在府東三百里本漢資中縣 又南逕富順縣東富順在敘州府東北

一百八十里本 又東南逕瀘州北又東南與江水 漢江陽縣地

會

酈道元云縣水至江陽縣方山下入江謂之縣水口蓋自五城以下瀡郎縣洛互受通稱縣水

口即沱水口也

江水又東逕合江縣北

合江在瀘州東一百二十里本漢符

縣

又東北逕江津縣北

江津在重慶府南一百八十里本漢江州縣地又

東北逕巴縣東南西漢羌白涪巴渝諸水自北來

注之

巴縣為重慶府治本漢江州縣後周改曰巴縣唐為渝州治按自渝上合州者謂之內江

庾仲雍所云涪內水是也自渝戎瀘上蜀者謂之外江庾仲雍所云蜀外水是也

又東北

逕長壽縣南

長壽在府東三百三十里本隋巴縣地

又東逕涪州北

涪陵江水自南來注之

涪州在府東四百五十里本漢枳縣隋改置涪陵縣

唐瀉涪州治大江在州北方興勝覽謂之蜀江又自成都登舟十二程至此合黔江即涪陵江也

東北逕鄴都縣南

鄴都在忠州西二百里本漢枳縣地

又**東北逕忠**

州南

忠州在府東一千里本漢臨江縣

又**東北逕萬縣南**

萬縣在夔州府

西四百五十里本漢朐忍縣地

又**東北逕雲陽縣南**

雲陽在府西一百七十里

本漢朐忍縣後周改曰雲安寰宇記蜀江在雲安縣南三十步

又**東逕奉節縣南**

夷水故道出焉

奉節夔州府治本漢魚復縣唐改曰奉節瞿塘峽在縣東即古廣谿

峽也寰宇記云灩澦堆周圍二十丈在夔州西南二百步蜀江中心瞿塘峽口冬水淺屹然露百餘

大夏水漲沒數十丈亦曰猶豫言舟子取途不決水脈也范成大吳船錄云峽中兩岸高巖峻壁谷

鑿之痕皴皴然有黑石灘最號險
惡接夷水一名清江詳見荊州
又東逕巫山縣

南巫山縣在府東一百三十里本漢巫縣巫峽在
縣東四十里吳船錄云自巫縣下巫峽灘瀧稠

險湍流洄洑其危又過夔峽三十
里至神女廟廟前灘尤洶怒
又東逕巴東縣

北巴東在湖廣歸州西九十里
本漢巫縣地梁瀉歸鄉縣
又東逕歸州南

在荊州府西五百二
十五里本漢秭歸縣
又東逕夷陵州南

南二百里本
漢夷陵縣
又東逕宜都縣北與夷水合

九十里本
漢夷道縣
夷水本首受奉節縣之大江今建始縣

北建始在夔州府東南本漢巫縣地晉分置建始
縣屬建平郡唐屬施州縣南至州一百三十里

夷水故道自巫山
縣南流入縣界

其故道皆已墮塞唯從縣南受

施州衛開蠻界水東逕巴東長陽

長陽在夷陵州西南八十里本

漢恨山縣屬武陵郡隋更名長楊唐改楊高陽其故城即今治縣南七十里廢巴山縣即古捍關

至宜都縣北又東入于江經所謂東別爲沱者禹

所導一爲梁州之沱今郢江是也一爲荊州之沱

古夷水是也

附論江源

華陽國志曰岷山一名沃焦山其跗曰羊膊江水所

出

李膺益州記曰羊膊嶺水分二派一東南流爲大江
一西南流爲大渡河

太平寰宇記曰羊膊山在平康縣

縣屬松州隋志平康縣有羊腸山腸

蓋膊字之誤

山下有二神湫大江始發之所

范成大吳船錄曰江源自西戎來由岷山澗壑中出
而合于都江今世所云止自中國言耳

陸游入蜀記曰嘗登岷山欲窮江源而不可得蓋自

蜀郡之西大山廣谷豁舒起伏西南走蠻箐中皆岷山也則江所從來遠矣

王應麟通鑑地理通釋曰大渡河一名羊山江源出鐵豹嶺嶺即羊膊之異名也

金履祥書注曰岷山數百峰大酉山爲最大雪山三峰闡其後冬夏如爛銀一谷名鐵豹嶺者有西岳廟廟下名羊膊石江水正源也其西南分一源又爲大渡河矣

按諸家言岷山所在不一而足然山雖廣遠而江水所出必有定處近世無能窮其源者隋經籍志有尋江源記一卷今不傳未知其說云何據漢志言江水出湔氐道西徼外則當以酈注所引益州記爲正自晉以下說江源者皆云出羊膊嶺與益州記同羊膊嶺一名鐵豹嶺計益州記江水發源自羊膊嶺東南下二百餘里至西陵又南下二百四十里至汶山故郡即今茂州是也然則江源在

茂州之西北去州四百四十餘里亦可謂遠矣而
范至能陸務觀乃云江源出西戎不可窮極蓋以

唐人言江源自松州甘松嶺始

元和志松州治嘉誠縣南至翼州一

百八十里甘松嶺在縣西南十五里交川縣北至州三十四里江源鎮在縣西北三十里而當

時又有謂羊膊嶺在茂州列鵝村者其地太近故

爲是說非謂江源更在羊膊之外也近志引江源

記云岷江發源于臨洮木塔山山頂分東西流南

流八百里經甘松嶺又南經漳臘堡西其水漸大

復經鎌刀灣達松潘下水關臨洮今陝西洮州衛
也在松潘之東北江源果發此則又自東北而來
與氐道西徼外之岷山相去懸絕爲此說者蓋因
隋志云岷山在臨洮郡臨洮縣括地志云岷山在
岷州溢樂縣見有一水自木塔山來入江者遂以
爲江水發源彼中明與漢志相背無稽之言不可
從也

錢遵王徐霞客傳曰霞客名弘祖江陰人平生好遠

遊其行也從一奴或一僧一杖二襆被不治裝不裹糧能忍飢數日能遇食即飽能徒步數百里凌絕壁冒叢箐扳援上下懸渡綆汲捷如青猿健如黃犢嘗過麗江憩點蒼由雞足而西出玉門關數千里至崑崙山窮星宿海去中夏三萬四千三百里登山風吹衣欲墮又數千里至西番還至峩峩山下託估客以湘江紀源一篇寓余言禹貢岷山導江乃汎濫中國之始非發源也中國入河之水寓省五入江之水

爲省十一計其吐納江倍于河按其發源河自崑崙
之北江亦自崑崙之南非江源短而河源長也又辨
三龍大勢北龍夾河之北南龍抱江之南中龍中界
之特短北龍祇南向半支入中國惟南龍磅礴半宇
內其脈亦發于崑崙與金沙江相並南下環滇池以
達五嶺龍長則源脈亦長江之所以大于河也其書
數萬言皆桑經鄺注及漢宋諸儒疏解禹貢所未及
余撮其大略如此

古書言崑崙者非一處一在槐江山南一在西海之外山海經所言是也一在于闐漢武所名之山是也一在吐蕃劉元鼎所稱紫山者是也霞客云河出崑崙之北江出崑崙之南其所謂崑崙者在何地乎據彼言出玉門關數千里至崑崙則崑崙當在西域玉門以東即是中夏之地既云出玉門數千里何又云去中夏三萬四千餘里乎即謂星宿海有若是之遠亦屬妄言昔劉元鼎奉使自廓

州洪濟梁南行二千三百里便得崑崙東距長安
止五千里而都實使還自星宿海東北至崑崙亦
不過三十日程何至如霞客所言之遠且西域之
崑崙與星宿海絕無交涉萬季野云及甘肅去雲
南麗江西北止一千五百里去四川馬湖正西亦
止三千里苟欲窮星宿海既至雞足山便當由麗
江而往不半月即可達其地舍此不由而更遠走
玉門關何也玉門東距肅州之嘉峪關約九百里

嘉峪南至麗江約五千里朶甘思去玉門則六七
千里矣不走千五百里之近而走六七千里之遙
必非人情意者以漢武所名之崑崙即都實所指
之崑崙乎夫漢之崑崙在于闐元之崑崙在吐蕃
相距可四五百里而霞客乃渾而一之其不學無
識一至此乎余謂霞客所言東西南北茫然無辨
恐未必身歷其地徒恃其善走大言以欺人耳非
但不學無識也人皆以爲能補桑經酈注及漢宋

諸儒疏解禹貢所未及過矣或曰僧宗泐云黃河
出西番抹必力赤巴山東北流爲河源西南流爲
犂牛河犂牛河即麗水一名金沙江者自麗江府
界東北流合若水爲瀘水又東北至敘州府而注
于江霞客言江源自崑崙之南殆謂此耳然抹必
力赤巴非崑崙也且岷山導江經有明文其可以
麗水爲正源乎霞客不足道傳紀垂於後世竒說
炫耀最易動人故吾特爲之辯

又東至于澧過九江至于東陵

釋文澧音禮涓按澧史記漢書並作醴

傳曰澧水名東陵地名正義曰鄭玄以此經言過言會者皆是水名言至于者或山或澤故以合黎爲山名澧爲陵名孔以合黎與澧皆爲水名楚辭云濯余佩兮澧浦是澧亦水名也九江禹前先有其處今導水過之非別有九江之水夏氏曰曾彥和云巴陵與夷陵相爲東西夷陵亦曰西陵則巴陵爲東陵可知許慎云迤邪行今江水過洞庭至巴陵而後東北邪

行合于彭蠡則九江不在尋陽明矣蔡氏曰九江見
荊州東陵巴陵今岳州巴陵縣也地志在廬江西北
者非是傅氏曰江水別而爲沱其經流則東至于澧
也渭按地理志武陵郡充縣歷山澧水所出東至下
雋入沅過郡二行千二百里充縣今爲九谿永定二
衛屬湖廣岳州府巴丘山在府城內西南隅亦名巴
陵又名天岳山水經注湘水北至巴丘山入江是也
鄭氏以澧爲陵名可也而又云今長沙郡有醴陵

縣其以陵名爲縣乎按郡國志醴陵縣屬長沙郡
本漢臨湘縣地後漢析置醴陵西北距澧州五六
百里大江安得至其地鄭謂因醴陵以名縣蓋據
史記漢書澧皆作醴故附會其說大非不可從易
氏云澧州在江南無非山澤澧陵是小山因水而
得名者此說近是然水或因山以得名亦未可知
巴丘山臨大江今岳州府城其遺址也吳使魯肅
以萬人屯巴丘即此尋江記云羿屠巴蛇于洞庭

其骨若陵故謂之巴陵事涉誕妄郭景純江賦所稱巴陵地道則指謂此山矣

水經注江水自夷道縣北合夷水又東逕枝江縣

南沮水從北來注之

漢志南郡枝江縣故羅國其故城在今枝江縣東

又

東逕上明城北

晉太元中苻堅寇荊州刺史桓沖徙渡江南使劉波築之移州治城

也江沱枝分東入大江縣治洲上故以枝江爲稱地理志曰江沱出西東入江是也盛弘之曰縣舊治沮中後移出百里洲西去郡一百六十里縣左右有數十洲槃布其中其百里洲最爲大也按上明城在今松滋縣界百里洲在今枝江縣東北六十里

又南逕江陵縣南

江縣

有洲號曰枚迴洲江水自此兩分而為南北江也
按枚迴洲在江陵縣西南六十里寰宇記引荊州

圖曰百里洲其上寬廣土沃人豐
洲首派別南為外江北為內江
又東逕江陵縣

故城南

故楚也今城楚船官地春秋之渚宮城南
有江津口江大自此始家語曰江水至江

津非方舟避風不可涉也故郭景純云濟江津以
起漲言其深廣也按江陵故城即今荊州府治江

水自枚迴洲分流
至此復合勢益大
又東逕郢城南
子囊遺言所築城也今在江陵

縣東北
三里
又東至華容縣西夏水出焉
江水左逕焉
中夏水按漢

志南郡華容縣夏水首受江東入沔
行五百里華容故城在今監利縣界
江水又東涌

水注之

春秋所謂閻敖游涌而
逸者也在今監利縣南
又逕南平郡孱陵

縣之樂鄉城北

城在今松滋縣東

又東逕公安縣北

今公安縣

東北五十五里有公安故城

又右逕陽岐山北

山東有城故

又

東右逕石首山北又東逕赭要

赭要洲名在大江中按石首山在今

石首縣西北孫宗鑑曰自竟陵南至大江並無丘陵之阻渡江至石首始有淺山石首者石自此而

首也又東至長沙下雋縣北澧水沅水資水合東流

注于洞庭之陂湘水從南來注之所謂江水會者

也

下雋故城在今武昌府通城縣西巴陵亦下雋地洞庭湖在其西南湘水篇云湘水東北流逕

長沙下雋縣西會資沅微澧四水同注洞庭而北會大江名之五渚巴丘山在湘水右岸山有巴陵

故城西對長洲南廢湘浦北對大江三水所會謂之三江口詳見荊州孫光憲北夢瑣言云湘江北流至岳陽達蜀江夏潦後蜀江漲過住湘波溢爲洞庭湖凡數百里而君山宛在水中秋水過此山復居于陸唯一以今輿地言之江水自宜都縣北條湘川而已

合夷水又東逕枝江縣北

枝江在荊州府西一百七十里百里洲在縣東

北六十里嘉靖初爲江水衝斷今爲上百里洲下百里洲

又東逕松滋縣北

松滋

在府西南一百二十里本漢高縣地

又東逕江陵縣南

江陵荊州府治隄防考云

大江流入郡境自西而北而東而南勢多紆折南北兩岸俱平行下隰水易漫流故有決溢之害濱江諸縣皆築隄以爲岸衛自松滋至巴陵之城陵磯長亘六百餘里北岸有陽州茅埠隄長亘七百

餘里咫尺不堅千里馮壑又東逕公安縣北公安在府東南一百二十里本漢孱

陵縣有沔陽鎮在公安故城東南又東逕石首縣北石首在府東南一百八十

里本漢葦容縣地又東逕監利縣西葦容縣北監利在府東南二百

里本楚容邑漢置葦容縣三國吳析置監利縣其故城在今縣東北章葦臺在縣西北六十里夏水

篤云夏水東經葦容縣南又東逕監利縣南韋昭曰雲夢在葦容縣郭景純言東南巴丘湖是也今

岳州府亦有葦容縣在府西少北一百五十五里本漢孱陵縣地晉分置南安縣隋更名葦容非古

葦容也又東至巴陵縣西北會洞庭之水巴陵岳州府治本漢

下雋縣地荆江口在縣西北洞庭水入江處亦名西江口又名三江口元和志巴陵城對三江口岷

江爲西江澧江爲中江湘江爲南江按三江口北岸有楊林浦一名楊葉洲蓋即水經注所謂巴陵故城西對長洲者此後世大江之經流酈道元所稱北江

者也禹之所導則異於是袁中道澧遊記曰酈道元注水經於江陵枚迴洲下有南北江之名南江即江水由澧入洞庭道也陵谷變遷今之大江始獨專其澎湃而南江之跡稍稍湮滅僅爲衣帶細流然江水會澧故道猶可考云今按小脩此義最爲精覈水經注澧水出武陵充縣西歷山東過其

縣南

今岳州府慈利縣所轄永定九溪二衛皆漢充縣地 雁山在永定衛西澧水自衛界流逕

九溪

又東婁水入焉

水出巴東界東逕零陽縣注于澧水

又東逕零

陽縣南

今慈利縣北有零陽故城

又東逕澧陽縣右會澧水

謂

澧口

今石門縣 又東逕澧陽縣南

縣南臨澧水晉天門郡治今在

西北有澧水

澧州西一百十里

又東逕作唐縣北

作唐今爲安鄉縣在澧州東南一百二十

五里北至公安縣界六十里

左合澧水水出西南天門郡界南

逕岑評屯屯塌澧水溉田數千頃又東南流注于

澧水

岑評屯在今澧州界州在岳州府西四百二十里北至公安縣八十里本漢零陽縣地隋

析置澧陽縣其故城即今州治澧水在州南三里

又東澧水出焉澧水又

南逕故郡城東東轉逕作唐縣南

今安鄉縣東南有作唐故城

又東逕安南縣南

今華容縣是

澧水注之

謂之澧口王仲宣詩曰悠

悠澧澧者也

又東與赤沙湖會

河水北通江而南注澧謂之決口按赤沙湖在

今華容縣西南亦謂之赤亭湖西接安鄉縣界

又東至長沙下雋縣西北

東注于洞庭湖俗謂之澧江口澧水自石門以西

與導江無涉其南江會澧故道參以近志有可得

而言者江陵縣西南二十里有虎渡口在龍洲之

南後漢郡守法雄有異政猛虎渡江去因名宋乾道七年湖北漕臣李燾脩虎渡隄即此水經注

江水自枚迴洲分爲南北二江北江有故鄉洲其下爲龍洲南江從此東南流

注于澧水同入洞庭蓋即所謂涔水也澧州志云

涔水爲岷江別派從公安入境爲四水口在州北七十里

東接安鄉湖口北連荆江又東南流過焦圻一箭河至匯口入

澧故稱涔澧楚辭望涔陽兮極浦今公安舊縣東

南有涔陽鎮即其地也澧水又東逕安鄉縣南會

赤沙湖東距巴陵縣百里而東入洞庭湖湖在巴陵縣西

南一百五十步

見元和志

此導江東至于漕過九江至

于東陵之故道也

春秋傳曰物莫能兩大故二水並行一盛則一微自然之理也昔禹既疏鑿三峽水勢并注其中而北谷村之舊流遂爲斷江其後魚復江所出之夷水亦致淺狹不可行舟近事如句容縣故江乘地北瀕大江今皆爲洲渚江水南去岸二十里楊子江舊闊四十里瓜洲本江中一洲今北與楊子橋

相連而江面僅七八里又如靖江縣大江舊分二派繞縣南北明天啓以來潮沙壅積北派竟成平陸與揚州之泰興相連以今驗古小修云北江漸盛而南江日微殆非臆說然自屈原九歌云望涔陽兮極浦橫大江兮揚靈蓋涔陽在涔水之北大江又在涔陽之北則戰國時固以北江爲正流而南江爲涔水矣年代久遠世鮮有知者地志水經所言宜乎與禹貢不合也

東池北會于匯

釋文池以爾反渭按于俗本作爲誤

蘇氏曰池也邇也林氏曰池者斜出之辭邵氏曰江漢水漲彭蠡鬱不流逆爲巨浸無仰其入而有賴其過彼不過則此不積所謂匯者如此故曰北會于匯匯言其外也蠡言其內也于匯不于彭蠡勢則然也蓋實志也渭按江水池北由沙羨始漢自大別以至彭蠡大勢皆東江自沙羨以至彭蠡則東且池北矣經先漢後江東匯爲彭蠡者漢也而江水亦至其處

故曰東迤北會于匯言與漢所匯之彭蠡會也于字俗譌作寫則其義不可通矣

傳云迤溢也東溢分流都共北會爲彭蠡正義云迤者靡迤邪出之言故寫溢也東溢分流又都共聚合北會彭蠡言散流而復合也鄭云東迤者寫南江孔意或然至之與會史異文耳渭按馬融曰迤靡也即邪出之意謂大勢東行而微帶北也傳以迤爲溢而分流殊不可曉林少穎云孔氏以東

迤爲句而北字屬下非經意也言北江中江者是
自彭蠡而東方合爲二江鄭氏以東地爲南江則
是自東陵而下已分爲三矣此說尤與經不合

水經注江水自下雋以東所紀山水地名或瑣細
難考沔水自石城以東尤多舛錯道元亦自謂未
必一得其實今據府州縣志以爲之綱而掇取水

經注及羣書要語附載于其下

金禮部郎中蔡正甫撰補正水經三

卷元歐陽原功爲之序曰其詳于趙代間水此固
景純之所難若江自尋陽以北吳松以東則又能

使道元之無遺恨者惜乎其書今不得見而靡所折衷也

江水自巴陵縣西北

會洞庭湖又東逕其縣北

水經注江水會湘水又東逕忌置山南江之右

岸有城陵山按今巴陵縣北有忌置洲宋書檀道濟等討謝晦至忌置洲列船過江即此其東有城陵磯東北接臨湘縣界磯下爲三湘浦元和志云在巴陵縣東北十二里黃潤玉云今江水衝城陵磯而臨江驛至岳陽湖口六十里皆淤沙漲起南環湖北沿江塞隘九江之口其章華臺之水亦淤窄又東逕臨湘縣北臨湘在岳州府東北七十五里晉以後爲巴陵縣地宋析置臨湘縣水經注江水自彭城磯東逕如山北北對隱磯二磯之間大江中有獨石孤立山東江浦世謂之白馬口按彭城磯在縣西江中元和志云在巴陵縣東北九十四里蓋其時未有臨湘也縣

東北十里有白馬磯山又有隱磯 又東逕嘉魚縣西北與沔陽州

分水

嘉魚在武昌府西南二百五十里漢沙羨縣地隋爲蒲圻縣地南唐分置嘉魚縣沔陽在

安陸府南少東三百三十里本漢州陵縣水經注江水東逕烏林南吳黃蓋敗魏武于烏林是也又

東右得蒲磯口即陸口陸水出下雋縣東逕蒲圻縣北又東逕蒲圻山北入江按蒲磯山在今蒲圻

縣南五十里圻與磯通元和志云赤壁山在蒲圻縣西一百二十里北臨大江蓋其時未有嘉魚也

今蒲圻臨江之地盡入嘉魚而蒲圻無江水 又東北逕江夏縣西漢陽

縣東又北漢水自北來注之

江夏爲湖廣布政司武昌府治本漢沙羨

縣地漢陽爲漢陽府治本春秋之夏洎亦漢沙羨縣地水經注江水自沙陽湖又東逕百人山南右

逕赤壁山北昔周瑜與黃蓋詐魏武大軍處也江水又東逕大軍山南又東逕小軍山南又東逕雞翅山北又東逕歎父山南對歎洲亦曰歎步又東逕魯山南古翼際山也山左即沔水口矣江之右岸有船官浦歷黃鵠磯西而南是曰黃軍浦船官浦東即黃鵠山東北對夏口城魏黃初二年孫權所築也按夏口故城在今江夏縣西南魯山即大別在漢陽府城東北半里黃鵠山在府城內西隅聳峙江口與大別對鸚鵡洲在城西南二里大江中尾直黃鵠磯明季蕩滅小軍山在漢陽縣西南五十里大軍山在縣西南六十里又北折而東逕武里百人山在縣西南八十里

昌縣北其對岸則黃陂縣黃岡縣

武昌縣在武昌府東北一百八

十里本漢鄂縣黃陂在黃州府西二百四十里本漢邾縣地黃岡為府治本漢西陽邾西陵三縣今

縣西北有邾縣故城水經注江水東逕邾縣南石
得黎巖北對舉口舉水出龜頭山西南流注于江

謂之舉口南對舉洲左傳定公四年吳楚陳于柏
舉疑即此也江水又東逕邾縣故城南南對蘆洲

又東逕鄂縣北右得樊口左逕赤鼻山南又東逕
西陽郡南郡治即西陽縣也江之右岸有鄂縣故

城今武昌也城南有袁山即樊山北背大江江上
有釣臺按蘆洲在今武昌縣西二十里一名伍洲

樊口在縣西北五里陸游曰黃州與樊口正相對
樊山在縣西一里赤鼻山在黃州府城西北蘇子

瞻誤認
馮赤壁
又東逕大冶縣北蘄水縣南
大冶在興國州西北一百

五十里本漢鄂下雉二縣地蘄水在黃州府東少
南一百十里本漢軹縣水經注江水合巴水又東

逕軹縣故城南故弭國也城南對五洲江水東會
希水口又東逕西陵縣故城南史記秦昭王遣白

起伐楚取西陵者也又東逕黃石山北即黃石磯也東山偏高謂之西塞按黃石磯在大冶縣東北三十里西塞山在縣東九十里元和志云在武昌縣東八十五里蓋與大冶分山也蕲水縣南有希水史記集解徐廣曰西陵屬江夏正義曰括地志云西陵故城在黃州黃山西二里又東逕

興國州北蕲州南

興國在武昌府東南三百六十里本漢下雉縣兼鄂縣地蕲州

在黃州府東少南一百八十里本漢蕲春縣水經注江水自西塞山又東蕲水注之又東逕蕲春故城南又東逕積石山南西陽尋陽二郡界也又東逕下雉縣北刊水從東陵西南注之又東左得青林口水出廬江郡之東陵鄉江夏有西陵縣故是言東矣尚書云江水過九江至于東陵者也按酈說非是辯

見荆州

又東逕瑞昌縣北廣濟縣南

瑞昌在江西九江府

西九十里本漢柴桑縣地廣濟在湖廣蘄州東七十里本漢蘄春尋陽二縣地大江去縣七十里

又東逕德化縣北黃梅縣南

德化九江府治晉永興初於此置尋陽郡

隋因改柴桑曰尋陽而江北之名遂移于江南黃梅在蘄州東一百六十里本漢尋陽縣其故城在

今縣東北元和志大江在黃梅縣南一百里

彭蠡澤在德化縣東南九

十里其水北注于江此道江東也北會于匯之所

經也

今洞庭湖遇江漲其水亦為江波所遏而經獨於彭蠡言匯澤者蓋禹時巴陵未有洲渚

九江即是江身與彭蠡異故不言匯澤也

吳幼清移前東匯澤為彭蠡六字于此東也北會

于匯之下其說曰鄂北對漢陽軍大別山漢水自
北來入江江水與之會合流曰匯故曰東也北會
于匯不言會于漢者以漢有漾沔滄浪之異名不
可指定一名而言故但曰會于匯也金吉甫則直
以匯爲誤字其說曰當作會于漢蓋江勢迤北處
正受漢口若至彭蠡則東流久矣匯字必因上文
而誤也今按江漢合流入揚州之域會彭蠡水始
有三江之目若以匯指漢水則北江中江不待過

彭蠡而始有其名矣禹貢于荊州言江漢無中江北江之名於揚州始言三江蓋必會南江而後可命之曰北曰中也周禮荊州曰其川江漢揚州曰其川三江與禹貢若合符節匪漢口明矣自宋以來說此經者遇難解處不以爲衍文則以爲錯簡不以爲錯簡則以爲誤字真禹貢之一厄也

東爲中江入于海

傳曰有北有中南可知曾氏曰豫章九江合于湖漢

東至彭蠡入江此九水蓋南江也南江乃江之故迹
非禹所導禹導漢水入焉與舊江合流而水之派分
爲南北故漢爲北江又導岷山之江入焉其流介乎
二江之中故爲中江南江乃故道故經不志程氏曰
經云東匯澤爲彭蠡東迤北會于匯是二語者附著
直略切南江以概其所不書者也彭蠡爲南江無疑禹
之行水嘗經疏導則雖小而見錄無所致力則雖大
而不書南江源派誠大且長正以不經疏導故自彭

蠡而上無一山一水得見於經然於其合并江漢而
以匯會名之使天下因鼎錯之實參北中之目而南
江隱然在二語中此聖經之書法也邵氏曰江水濬
發最在上流其次則漢自北入其次則彭蠡自南入
三江並持而東則江爲中江漢爲北江彭蠡所入爲
南江可知已非判然異派之謂也且江漢之合茫然
一水唯見其爲江也不見其爲漢也故曰中江曰北
江然其勢則相敵也故曰江漢朝宗凡集傳謂經誤

者非是餘干張克脩云寶亦云渭按三江之說自康成子瞻以後得三氏而愈明江漢共爲一瀆而其入海也則漢爲北江江爲中江即朝宗于海並舉二川已爲之張本矣南江無所致力不用循行故導水無文

江水至德化縣東北贛水合彭蠡湖從南來注之
江水又東北逕湖口縣北又東北逕彭澤縣北其
對岸則宿松縣望江縣

湖口在江西九江府東六十里本漢彭澤縣彭澤在

府東一百二十里本漢彭澤縣地縣北大江中有馬當山陸龜蒙銘曰天下之險在山曰太行在水曰呂梁合二險而爲一又聞乎馬當宿松在江南安慶府西南二百六十里本漢皖縣地大江在縣南一百二十里縣志云小孤山在縣東南一百二十里舊時峙江北岸與南岸彭郎磯相對江水經此湍急如沸明成化十二年江水忽分流于山北流日益廣自是屹立中流大江澎湃環于四面望江在府西南一百二十里亦漢皖縣地晉置大雷戍即今縣治大江在縣南十五里楊溪河即古雷水也亦曰雷池又東北逕東流縣西其對岸則懷寧縣流東

在江南池州府西少南一百八十里亦漢彭澤縣地大江去縣一里懷寧爲安慶府治本漢皖縣大

江在南又東北逕貴池縣北其對岸則桐城縣貴池

門外

池州府治本漢石城縣大江去縣五里桐城在安慶府東北一百二十里春秋桐國漢置樅陽縣史記秦始皇自雲夢浮江渚下觀籍柯括地志云在同安縣東隋改樅陽曰同安也漢書武帝自尋陽浮江薄樅陽而出今又東北逕銅陵縣西又東北縣東南有射蛟臺

逕繁昌縣北其對岸則無爲州

銅陵在池州府東北一百里本漢陵

陽春穀二縣地大江去縣里許鵲頭山在縣北左傳昭五年楚伐吳吳人敗諸鵲岸即此繁昌在太平府西南一百三十里本漢春穀縣大江去縣五十里赭圻城西臨大江吳所置赭圻屯也縣東北三十里江中有鵲尾洲無爲在廬州府東南南二百七十里春秋巢國地漢置居巢襄安臨湖三縣水經注沔水與江合流又東合彭蠡澤又東北出居巢縣南古巢國也湯伐桀桀奔南巢即此江水自

濡須口又東左會柵口水水導巢湖東過故東關城又東南流注于大江按州東少南九十里爲巢縣漢居巢縣地巢湖在縣西亦作灤湖又名焦湖方輿勝覽云湖周四百餘里占合肥舒城廬江巢四縣之境納諸水而注之江濡須水在縣南源出巢湖亦曰東關水又按寰宇記江水在含山縣南一百七十里九域志亦云含山縣有大江蓋唐宋時其南境本潁江自明初割縣南周興銅城梅山等鄉入無爲州而縣界遂無江矣又東北逕蕪湖縣西又北逕當

塗縣西其對岸則和州

蕪湖在太平府南少西六十里春秋吳鳩茲邑漢置

蕪湖縣大江去縣五里蟛磯在縣西七里江中江在縣南一名蕪湖水元和志云蕪湖水在當塗縣西南八十里源出丹陽湖西北流入大江寰宇記云蕪湖在蕪湖縣界長七里縣志以縣東十五

里天成湖當之一名天聖湖當塗太平府治本漢
丹陽縣牛渚山一名采石山在縣西北二十五里
西臨大江渡江至和州二十五里陸游云古來江
南有事從采石渡者十之九從京口渡者十之一
蓋以江面狹于瓜洲也和州在江南布政司西一
百三十里本漢歷陽縣大江在州東南江上有梁
山宋大明七年祀梁山閱江中立雙闕于山上
元和志云梁山在歷陽縣南七十里東岸有博望
山屬姑孰二山隔江相對望之如門南朝謂之天
門山橫江浦在州東南元和志云歷陽縣東南二
十六里直江南采石渡處烏江浦在州東北
元和志云在烏江縣東四里即亭長棧船處又東
北逕江寧縣西其對岸則江浦縣

江寧與上元縣並爲江南布政

司江寧府治本戰國楚金陵秦改曰秣陵漢置秣
陵縣屬丹陽郡其故城在今縣東南五里寰宇記

云大江從江寧縣西一百二十里承塗縣分黃浦上田爲界紆回屈曲二百九十三里與和州爲江揚州六合並分中流爲界胡三省曰江水東流自武昌以下漸漸向北蓋南紀諸山所迫陂陀之勢漸使之然也至于江寧江流愈北蓋建康當下流都會望潯陽武昌皆直南望歷陽壽陽皆直西故建康謂歷陽皖城以西皆曰江西而江西亦謂建康爲江東建康謂姑孰爲南州京口爲北府皆地勢然也三山在縣西南五十七里一名三山磯又有歷山葱姥山落星山皆西臨大江江浦在府西四十里本漢堂邑全椒二縣地舊志云大江在縣東南三里自浦子口渡江至府城觀音門二十里而近一名安陽渡又云大江自梁山來曰楊子江抵浦子口接六合縣界曰宣化江又東北逕上元縣北其對岸則六合縣

上元本漢秣陵縣地大江去縣

二十餘里有山踞江而出者曰焦家背又東曰觀音山燕子磯又東歷濤山以接黃天蕩在縣東北八十里胡三省曰大江過昇州界浸以深廣自老鸛背渡白沙橫闊三十餘里俗呼黃天蕩六合在府東北一百三十里漢堂邑縣地大江在縣東南六合山在縣西北七十五里隋開皇九年晉王平陳於此臨江觀渡兵馬瓜步山在縣東南宋元嘉二十七年魏主燾至六合登瓜步隔江望秣陵纔數十里寰宇記引南兗州記云瓜步山東五里有赤岸南臨江中潮水自海入江衝激六七百里至此岸側其勢始衰按枚乘七發言廣陵曲江之濤曰凌赤岸簞扶桑郭璞江賦云鼓洪濤于赤岸淪餘波于柴桑皆謂此也輿地紀勝云滁河即古涂水源出合肥縣東流逕全椒滁州六合至瓜步入江瓜步之東又有石帆山矗居江中又東逕句容山東即黃天蕩江流至此波濤甚險

縣北其北岸則儀真縣

句容在府東九十里本漢句容江乘二縣大江去縣

七十里龍潭鎮在縣西北八十里逼臨大江儀真在揚州府西七十里本漢江都縣地唐為楊子縣

縣西二十里宣化鎮有五馬渡晉五王于此渡江故名 又東逕丹徒縣北其

北岸則江都縣

丹徒鎮江府治春秋吳朱方邑漢置丹徒縣北固山在府城北下臨

長江京岷山在城東五里即秦所鑿泄王氣處吳謂之京口以此蒜山在府西五里有西津渡北與

瓜洲對岸舊名蒜山渡金山在城西西北七里江中周必大筆錄云此山大江環繞每大風四起勢若

浮動名浮玉山唐有裴頭陀於此開山得金賜名金山焦山在城東北九里江中後漢焦先隱此因

名旁有海門二山金焦相望十五里江都揚州府治漢舊縣故城在今府城南四十六里為江水所

侵魏志文帝黃初六年行幸廣陵故城臨江觀兵
即此地瓜洲鎮在府城南四十五里有渡以通鎮
江元和志云江都縣大江南對丹徒之京口舊閘
四十餘里今閘十八里日知錄云古時未有瓜洲
蔡寬夫詩話潤州大江本與今楊子橋對岸而瓜
洲乃江中一洲耳今與楊子橋相連矣以故自古
南北之津上則由采石下則由江乘而京口不當
往來之道史記秦始皇登會稽還從江乘渡正義
云江乘故縣在今潤州句容縣北六十里吳徐盛
作疑城自石頭至江乘晉蔡謨自土山至江乘鎮
守八所城壘凡十一處皆以沿江爲防守之要今
江乘去江幾二十里以外皆爲洲渚而渡口乃移
于龍潭又瓜洲既連楊子橋江面益狹而隋唐之
代復以丹陽郡移治丹徒於是渡者舍江乘而趨
京口宋乾道四年築瓜洲南北城而京口之渡至
今因之按楊子江今北去揚州府城四十里唐書

齊潞爲潤州刺史州北距瓜步沙尾紆迴六十里
舟多敗溺潞徙漕路由京口埭治伊婁渠以達楊
子歲無覆舟減運錢數十萬又立伊婁埭官征其
入胡三省曰今之楊子橋或是唐楊子縣治所橋
以此得名也地理志江都有江水祠渠
水首受江北至射陽入湖即邗溝也

陽縣北又東逕武進縣北其北岸則泰州鎮江府

東六十四里本漢曲阿縣大江在縣東北六十里
又東北十里爲包港南接嘉山北通大江又東十
里則武進之孟瀆河口也武進爲常州府治春秋
吳延陵邑漢置毗陵縣大江在縣北五十里地理
志毘陵季札所居北江在北東入海水經注云毘
陵縣北二百步有故城本毘陵郡治舊去江三里
岸稍毀遂至城下江即北江也泰州在揚州府東
一百二十里本漢海陵縣唐爲吳陵縣大江在州

南漢志海陵有江海會祠

又東逕江陰縣北其北岸則泰興縣

靖江縣如皋縣

江陰在常州府東北九十里本漢昆陵縣地大江在縣北有馬馱沙

與泰興縣分領君山臨江南去縣二里亦名瞰江山泰興在揚州府東南一百四十里唐爲海陵縣地靖江在常州府東北一百十里本唐海陵吳陵二縣地宋爲泰興縣地元改屬江陰縣明成化五年析置靖江縣孤山舊在縣東北二十五里江中成化八年後潮沙壅積轉而成田今山在平陸新志云大江舊分二派統縣南北天啓以來潮沙壅積縣北大江竟爲平陸因開界河與泰興分界而大江唯經其東南縣遂爲江北之地矣按漢吳王濞都廣陵枚乘說濞曰轉粟西鄉不如海陵之倉臣瓚云海陵縣名也有吳太倉又曰修治上林不長洲之苑如淳云以江水洲爲苑也韋昭曰長

洲在吳東後漢省海陵入東陽縣郡國志臨淮郡東陽下云有長洲澤吳王濞太倉在此然則長洲苑亦故海陵地也今不知在何處竊疑靖江縣大江舊分繞其南北本是一洲蓋即如溥所謂以江水洲瀉苑者也如皋在泰州東南一百四十五里本後漢廣陵郡地晉分廣陵置山陽郡有如皋縣隋省唐析海陵縣地置如皋鎮五代時南唐升爲縣大江在縣南

又東逕常熟縣

北其北岸則通州

常熟在蘇州府北八十里本漢吳昆陵二縣地大江去縣四十

里福山臨江有港東連大海曰福山港通州在揚州府東四百里本漢海陵縣之東境狼山在州南十八里布洲峽在州南四十里江中黃子鴻曰常熟與通州相對古時縣界闊遠故東北濱海自明中葉分置太倉州之後凡縣境濱海之地已割屬之今江自太倉之七鴉口始折而南是爲大洋其

在本縣境者自福山北距通州之狼山水
面不過百里止可謂之江尾而非海也 又東逕

太倉州北其北岸則海門縣又東入于海 太倉在蘇州府

東北一百十里本漢婁縣地梁以後爲崑山縣地
明初置太倉衛弘治十年始割崑山常熟嘉定三

縣地置太倉州婁江在州南大海在州東北南接
嘉定北接通州邗直水利書云今崑山之東地名

太倉俗號岡身朱長文吳郡續圖經云濱海之地
岡阜相屬謂之岡身州東北有七鴉浦大江由此

入海海中有姚劉沙直江口之東南今爲崇明縣
在州東二百八里元時海運從劉家港出海至此

放洋海門在通州東一百里本唐海陵縣之東洲
鎮五代時置海門縣海舊在縣東十五里有六港

皆東通大海潮漲則盈退則涸其地爲海水所侵
吞食日廣 本朝康熙初縣治遂淪于海今爲海

門鄉併入州境此東爲中江入于海之所經也

范成大曰江出岷山其源實自西戎萬山來至嘉州而沫水合大渡河以會之至敘州而馬湖江出自夷中以會之又十五里而南廣江會之至瀘州而內江自資簡等州會之至恭州而嘉陵江自利閬果合等州會之至涪州而黔江又自黔州合南夷諸水會之至萬州而開江水自開達等州會之夫然後總而入于峽是江自峽而西受大水凡八

及出峽而下岳陽則會之者洞庭湖所受湖南北
諸郡水也又自是而下鄂渚則會之者漢口所受
興元諸郡水也又自是而下黃州東四十里則會
之者巴河也又自是而下江州則會之者彭蠡今
名鄱陽湖所受江東西諸郡水也又自是而下則
會之者皖水所受淮西諸水也夫然後總而入于
海是江自峽而東又受大水凡五略計天下之水
會于江者居天地間之半其名稱之大而可考者

凡十有三故曰江源其出如甕而能滔滔萬里以
達海所受者衆也嗚呼問學者可以觀矣

漢志蜀郡湔氐道下云禹貢岷山在西徼外江水
所出東南至江都入海過郡七行二千六百六十
里按今江水所過於漢爲蜀郡犍爲巴郡南郡長
沙江夏豫章廬江丹陽會稽廣陵凡十郡一國而
志云過郡七蓋江都在江北據北岸言之故不數
南岸之長沙豫章丹陽會稽也又水經江水東逕

宜昌縣之流頭灘注引袁崧曰自蜀至此五千餘里干寶晉紀云吳孫皓使紀陟如魏司馬昭問吳戍備幾何對曰西陵至江都五千七百里宜昌今宜都也在西陵之東誠如所言則江自岷山至江都入海行萬餘里而志云二千六百六十里相去懸絕二千之誤理無可疑閻百詩云自江都至夷陵州古西陵即水道曲折亦不及二千里吳使大言以夸敵耳就令如此亦當有七八千里嘗攷尚

書纂言載易氏之說云江源在松州交川縣西北
三十里南流二百四十里至翼州翼水縣又六十
里至茂州汶山縣又三百七十里至成都府又二
百里至眉州通義縣又五百六十里至戎州夔道
縣又三百十里至瀘州瀘川縣又七百里至渝州
巴縣又三百四十里至涪州涪陵縣又三百五十
里至忠州臨江縣又二百六十里至萬州南浦縣
又三百里至夔州魚復縣又一百里至巫山縣又

三百三十里至歸州秭歸縣又二百里至硤州夷
陵縣出峽又三百三十里至江陵府江陵縣又五
百七十里至岳州巴陵縣又五百里至鄂州江夏
縣又六百里至江州德化縣又五百八十里至池
州又七百四十里至鎮江府又三百里至泰州入
海以上江水所行自交川至夷陵凡四千三百三
十里較袁崧少六百七十餘里自夷陵至泰州凡
三千六百三十里較紀陟少二千七十里陟言誠

夸謂不及三千亦非也江自松潘至秦州行七千九百六十里自秦州至海門入海又四百里通計得八千三百餘里二當作八或是七而先儒釋漢書者曾無一語駁正豈近世傳寫之誤而古本不若是與

漢志滌氏道下云江水東南至江都入海江都下云有江水祠海陵下云有江海會祠皆以北岸言之江海會者謂江入海處也毘陵下云北江在北

東入海則以南岸言之今泰州泰興靖江如皋通
州海門漢時皆爲海陵縣地今武進江陰常熟及
太倉瀕海之鄉漢時皆爲昆陵縣地故大江入海
在其境班氏所言初無滲漏然北江者大江之正
流也而志與中江南江並列而爲三使枝幹不分
石城分江水即南江之上源而松江在吳縣南者
中江由陽羨入海之道也志更以爲南江使首尾
橫決此則其所短耳水經依導水之序先沔而後

江沔水篇云與江合流東過彭蠡澤又東北出居巢縣南又東至石城縣分爲二其一過毘陵縣北爲北江而不及江都蓋舉其南而遺其北也江水篇叙至下雉縣北東陵鄉之東北而止以是應過九江至于東陵之丈而不知此東陵非禹貢之東陵也自是以下則以爲與沔水同故不復見然沔水篇但云過毘陵爲北江而下文則專敘南江至餘姚入海無一言及于北江遂使志家有錯認北

江至山陰爲浙江者貽誤不小酈注則又兼用韋
昭郭璞庾仲初之說分南江爲二派一自湖口東
出爲松江下七十里歧分爲三江口以入海一歷
烏程縣南通餘姚縣合浙江浦陽江以入海而總
結之曰是所謂三江者也故子胥曰吳越之國三
江環之民無所移矣但東南地卑萬流所湊濤湖
泛決觸地成川枝津交渠世家分夥故川舊瀆難
以取悉雖麤依縣地緝綜所纏亦未必一得其實

也今按太行恒山之東地平土疏河漳滹沱等水
性善徙一朝泛決觸地成川者有之揚州土雖塗
泥而不甚疏惡時或泛決亦未聞有觸地成川之
事其所謂枝津交渠者蓋自吳通渠三江五湖之
後日加穿鑿以資灌溉便舟楫遂致川舊瀆雜
亂不明非水自爲之也然此等混淆終無害于禹
貢學者但能遵鄭蘇之說以三江爲一派則上自
彭澤下至毘陵海陵大江所行禹迹具存按圖而

考歷歷可據又何必乞靈于孟堅取裁于善長也
哉

禹貢錐指卷十四下

欽定四庫全書

經部

禹貢錐指卷十五
六

詳校官監察御史臣王爾烈

通政使司副使臣莫瞻菴覆勘

總校官庶吉士臣倉聖脈

校對官檢討臣盧應

謄錄監生臣徐壇

欽定四庫全書

禹貢錐指卷十五

德清胡渭撰

道沈水東流爲濟入于河

釋文沈音充
又以轉反

傳曰泉源爲沈流去爲濟在溫西北平地正義曰地理志云濟水出河東垣縣王屋山東南至河內武德縣入河見今濟水所出在溫之西北七十餘里渭按漢垣縣故城在今山西平陽府垣曲縣西四十里溫

縣故城在今河南懷慶府溫縣西南武德故城在今武陟縣東黃河在縣南與開封府河陰縣分水

水經濟水出河東垣縣東王屋山爲泲水

王屋山在今懷

慶府濟源縣西北八十里濟源本漢軹縣屬河內郡隋改置濟源縣縣西有王屋故城後周所置本垣縣地元和志云王屋山在王屋縣北十五里元省縣入濟源故濟源有王屋山西南接垣曲縣界垣曲故垣縣也又東至溫縣西北爲濟水

溫縣本周畿內司寇蘇忿生之

邑又東過其縣北屈從縣東南流過墳城西

墳城

今在溫縣東

又南當鞏縣北南入于河

黃河在溫縣南與河南府鞏縣

分水鞏縣故城在
今縣西南三十里
注云山海經曰王屋之山灑水

出焉西北流注于泰澤郭景純云灑沈聲相近即

沈水也潛行地下至共山南復出于東丘共山在濟源縣

北十
二里
今原城東北有東丘城括地志云沈水出王屋山頂崖下石泉滯

而不流其深不測既見而伏至濟源縣西北二里平地其源重發而東南流按故原城在濟源縣西

北二里今濟瀆廟西龍潭東北有其遺址風俗通曰濟出常山房子縣

贊皇山廟在東郡臨邑縣今按二濟同名所出不

同鄉源亦別斯乃應氏之非矣漢志常山房子縣贊皇山石濟水所

出東至廩陶入泚元和志趙州贊皇縣濟水源出贊皇山西北流去縣南十里此別是一濟水應劭以爲四潰誤也今濟水重源出温城西北平地水有二源

東源出原城東北俗謂之濟源城其水南逕其城

東故縣之原鄉與西源合西源出原城西東沅水

注之水出西南東北流注于濟

元和志濟水在濟源縣東北三里有

二源其深莫測西源周圍六百八十五步深一丈皆繚之以周牆李濂遊濟瀆記云濟瀆廟後有池是爲東池即東源周僅百餘步池西有石橋橋西爲西池周如東池舊記濟水出王屋山頂太乙池伏流地中東行九十里復見于此其太乙池今亦涸矣劉漪西源辨曰濟水二源舊志唯以廟垣石

橋爲界按水經注二源一在原城東北一在原城西南爲地殊遠不可以一橋之界遂分東西而謂二原俱在是也意此爲池之東源信矣池西二里又有一源舊稱爲龍潭時出時沒不關水旱下流經濟廟南會池水於東北當瀉濟之西源無疑也

濟水又東逕原城南東

合北水亂流東南注分爲二水一水東南流卽濟

水又東南逕郟城北而出于温

郟當作絺今河內縣西南有絺城元

和志濟水經河內縣

一水枝津南流注于湨

湨水出原

城西北原山勳掌谷南逕原城西而南注于河春秋會于湨梁謂是水之墳梁也爾雅曰梁莫大于湨梁湨古閭切濟水於温城西北與故瀆分南逕温縣故

城西又南歷虢公臺西自覽曰温城南有虢公臺
基址尚存濟水南流注于河也濟水故瀆於温城
西北東南出逕温城北又東逕虢公冢北自覽曰
虢公冢在温縣郭東濟水南大冢是也濟水當王
莽之世川瀆枯竭其後水流逕通津渠勢改尋梁
脈水不與昔同渭按濟水故瀆即漢志所謂東南
至武德入河者蓋禹迹也第五卷河水注云成臯
大伾山在河內脩武武德之界濟沉之水與滎播

澤出入自此即經所謂濟水從北來注之者今濟水自溫縣入河不於此也所入者秦溝水耳即濟

沚之故瀆矣

沁水篇云沁水東過武德縣南積爲坡有朱溝水注之其水上承沁水於

沁水縣西北自方口東南流奉溝水右出焉又東南流古泄瀉沙溝水東逕隰城北殷城南而東南注于陂陂水又東南流入河先儒亦咸謂是爲沙渠故班固及闕駟並言沙水至武德入河按沙溝即奉溝之下流古濟水由此入河故謂之沙渠沙溝當在今武陟縣界也

正與此相發

明濟水於武德入河南直成臯今汜水河陰之界是也其後由溫縣入河則南直鞏縣所謂津渠勢

改不與昔同者也今其故道又盡陷河中濟水唯

從枝津之合溴水者至孟縣東南入河

見懷慶府志南

直孟津縣其流益短矣由大禹而來濟水入河之

道凡再變

溢爲滎

謂按溢漢書作軼
顏氏曰軼與溢同

曾氏曰職方云其川滎雒者禹時爲滎澤而已至周

則爲川穆天子傳浮于滎水乃秦廣樂是也黃氏曰

經溢爲滎道荷澤被孟豬皆一字之工足以觀禹迹

吳氏曰濟既入河其伏者潛行地下絕河而南溢爲
滎澤再出于陶丘北溢者言如井泉自中而滿非有
來處如荷澤被孟豬之被出者言在平地自下而涌
非有上流如某水至某處之至滎澤後既填塞陶丘
亦無竇濟瀆故道不可復尋矣渭按書溢書出僅一
見乃禹貢之特筆當與他水導源首受者不同吳氏
義最精地理志云濟水自垣縣東南至武德入河軼
出滎陽北地中即經所謂溢爲滎也曰軼出地中則

重源顯發不與河通可知矣說者以滎播河濟往復
徑通爲禹之舊迹非也焦弱侯云伏見不常而識其
爲濟此禹之所以爲神旨哉言乎

傳云濟水入河並流數十里而南截河又並流數
里溢爲滎澤在敖倉東南正義云此皆目驗所說
也濟水既入于河與河相亂而知截河過者以河
濁濟清故可知也渭按成臯有大伾山在今開封
府鄭州汜水縣西一里水經注云晉地道志曰濟

自大伾入河與河水鬪南決爲滎澤又云大伾在河內脩武武德之界濟沅之水與滎播澤出入自此山東至河陰縣四十一里又東至滎澤縣西北之敖倉十餘里通計得五十餘里故傳約言之曰河濟並流數十里又數里溢爲滎澤在敖倉東南也然傳言濟與河並流始在北繼截河而南則似兩人同行街北一人忽截街而南別與人同行數里乃獨抵所欲詣處人之行路固有然者水則安

能且河大而濟小濟既入河河挾以俱東濟性雖
勁疾恐亦不能于大河之中曲折自如若此也滎
陽石門水首受河處水經直謂之濟水京相璠名
爲出河之濟酈道元云濟水分河東南流皆不以
清濁爲言謂濟與河亂南出還清自潁達始後之
好事者從而附會言曾有人伏水底見渾河中清
流一道直貫之者乃濟也世遂有濁河清濟之圖
二水劃然王充論衡曰俗語不實成爲丹青丹青

之言聖人惑焉其是之謂矣林少穎云濟清而河濁濟少而河多以清之少者會濁之多者不數步間則清者皆已化而爲濁矣既合流數十里安能自別其清者以溢爲滎乎林氏此言能窮物理而不爲俗語所惑者也東坡謂禹以味別知滎之爲濟說本許敬宗亦非蔡傳云經所書單立道流條例若斷若續而實有源流或見或伏而脈絡可考先儒皆以濟水性下勁疾故能入河穴地流注顯

伏此說似勝于孔然流水至泰澤潴而不流故知其穴地而入此地上之事有目者所共見若河中之事誰則知之豈真有伏水底者見清流一道穴地而入出而言之邪影響之談殆難據信矣

泰澤之水有上源與鹽澤相似但至此潴而不流入識其爲潛行地下耳滎澤則異于是其水似井泉自中而滿不可指一路爲源故吳幼清云無來處也東阿之井沈存中以爲濟水澤雖大其亦此

類與

水經河水注云東阿縣故城北門內西側泉上有大井其巨若輪深六七丈歲嘗煮膠以

供天府本草所謂阿膠也故世俗有阿井之名今在陽穀縣東北六十里沈存中夢溪筆談云古說濟水伏流地中今歷下凡發地下皆是流水東阿亦濟水所經取井水煮膠謂之阿膠其性趣下清而且重用攪濁水則清故禹時之滎澤濇而不流以治淤濁及逆上之痰也

後人導爲滎川此說創自曾彥和而余深信其然者蓋使滎澤陶丘之間禹時果一水相通則滎瀆距河陸路無幾貢道之浮濟者必書曰逾于河矣而經不然則以陶丘滎澤相去可五百里陸路艱

難故必由潔以達河耳自說者謂河濟本相通陶
丘之濟亦非復出舟航可以直達而潔遂獨爲兗
州北境之所浮於青徐揚無涉矣以此言貢道頗
覺直捷而不知其有礙於導沈之經者大也程泰
之云言經者不可執一得其一隅而三隅對求皆
無所礙乃爲通耳此窮經之要訣學者所當知也
詩大雅雅感沸檻泉維其深矣箋云檻泉正出涌出
也李巡注爾雅曰水泉從下上出曰涌泉春秋公

羊傳昭公五年叔弓帥師敗莒師于潰泉潰泉者
直泉也直泉者涌泉也此皆水之軼出地中而無
上流來處者阿井趵突其類也又有一切證爾雅
潰大出尾下注云今河東汾陰縣有水口如車輪
許潰沸涌出其深無限名之曰潰馮翊邵陽縣復
有潰亦如之相去數里而夾河河中渚上又有一
潰潰原皆潛相通在汾陰者人壅其流以爲陂種
稻呼其本出處爲潰魁此是也尾猶底也愚按三

漢地下潛通隨實涌出正與濟水相似如謂濟之
溢爲滎者截河而南穴地而出然則汾陰之漢亦
自河水中穴地而溢爲渚上之漢渚上之漢復自
河水中穴地而溢爲郟陽之漢邪此理甚明不待
智者而後曉也觀汾陰陂其漢以溉稻田更可悟
滎澤俾流不接陶丘之義

說文滎絕小水也余未識其義以問百詩百詩曰
爾雅正絕流曰亂邢昺疏云正直也孫炎所謂橫

渡是也以濟水截河南過爲滎故以絕字解滎至
小水二字則有唐高宗許敬宗問答在高宗曰天
下洪流巨谷不載祀典濟甚細而在四瀆何哉敬
宗曰瀆之言獨也不因餘水獨能赴海者也濟潛
流屢絕狀雖微細獨而尊也此可以爲其注脚矣
百詩此解不減徐楚金繫傳然濟絕河爲滎自是
漢儒訓詁禹之所以名水恐未必爾也

滎澤至周時已道爲川與陶丘復出之濟相接然

河濟猶未通波及周之衰有於滎陽下引河東南
爲鴻溝與濟汝淮泗會者而河始與濟亂鴻溝首

受河處一名葭蕩渠

水經河水合汜水又東過滎陽縣葭蕩渠出焉

亦名

汴渠

後漢明帝紀修汴渠注云即葭蕩渠也汴自滎陽首受河所謂石門在滎陽山北一里

又名通濟渠

元和志汴渠在河陰縣南二百步亦名葭蕩渠大業元年更開導名通濟

渠即今河陰縣西二十里之石門渠也

河陰縣在今鄭州西

北五十里漢滎陽縣地隋爲汜水滎澤二縣地唐開元中析置河陰縣

水經直謂之

濟水

漢志滎陽縣有葭蕩渠首受洙水經本此洙即京相璠所謂出河之濟也

曰濟水

當鞏縣北入河與河合流又東過成臯縣北

成臯即春

秋之虎牢漢置縣屬河南郡今爲汜水縣又東過滎陽縣北

本韓滎陽邑漢爲縣

屬河南郡今滎澤河陰二縣皆其地此猶合河濟而言之也

是即孔傳所云

濟水入河並流數十里而南截自下專言濟水曰

又東至北礫礪南東出過滎陽北

北礫礪未詳蓋在河南濟北其

水西注于河者此濟分河東南流即王景所修故瀆也渠

流東注浚儀故復謂之浚儀渠漢靈帝建寧四年

於敖城西北塹石爲門以遏渠口謂之石門

此即賈讓

所謂滎陽漕渠也其水門但用木與土至是始壘石爲之故世亦稱石門水門

廣十餘丈西去河三里南帶三皇山亦謂之三室

山也又東逕西廣武城北又東逕東廣武城北

廣武

山在今滎澤縣西二十里接河陰縣界劉昭云山有二城曰東廣武西廣武各在山一頭相去二百餘步又東逕敖山北

山上有城秦置倉于其中故亦曰敖倉城括地志云敖倉在滎

澤縣西北十五里石門之東北臨汴水南帶三皇山按今縣在隋縣南五里則敖城東南去今縣當二十里也又東合滎瀆

瀆本作澤誤玉海引此作滎瀆與酈注合今從之

瀆首

受河水有石門謂之滎口石門

門南際河有故碑云陽嘉三年立激

岸側以捍鴻波按蘇代曰決滎口魏無大梁即此處也首受河水以上承河陰石門水而言然昔人導澤水以爲川從此門而出故謂之滎口石門而地形卑蓋故滎播所道

自此始也

河陰石門漢建寧四年立在敖城西北滎口石門漢陽嘉三年立在敖山東時

地各別近志混而爲一大謬兩石門相去數十里滎瀆前已有之滎陽下引河其所溝通者裁數十里爲功亦甚易也

濟水又東逕滎陽縣北

上文東過滎陽縣北謂河濟並

流此專主濟水而言宋白續通典云滎陽故城在滎澤縣南十七里按今滎澤縣北五里有滎澤故城隋置明洪武八年爲河水所圯移今治是滎陽故城東北去今治止十二里也

又東南

礪石磎水注之

水出滎陽城西南李澤澤中有水即古馮池東北流厯敖山南又東

北逕滎陽縣北斷山東北注于濟世謂之礫石澗
即經所謂礫溪矣按又東二字為句石字衍觀注

云經所謂礫溪可知上有
北礫溪故此為南礫溪
又東索水注之水出京
縣西南

嵩渚山即古旃然水東北流至滎陽
城北而北注于濟京縣今為滎陽縣
又東逕滎澤

北古滎水所都也京相璠曰滎澤在滎陽縣東南

與濟隧合濟隧上承河水於卷縣北河句南逕卷

縣故城東漢志河南郡有卷縣其故城在今原武縣西北七里又南逕衡雍

城西城在原武縣西北五里與出河之濟會又南會于滎澤

濟水又東逕垂隴城北春秋文公三年晉士穀盟于垂隴京相璠曰鄭地

又東南逕釐城東

即春秋之時來左傳所謂釐京相璠曰在滎陽縣東四十里

又東合黃水

水發源京縣黃淮山世謂之京水東北流逕滎澤而北注于濟

又東

分爲二水其枝瀆曰北濟

詳見後

濟水東逕陽武縣

北

歷長城東南流葢蕩渠出焉

又東北逕陽武故城南又東逕

封丘縣南又東逕大梁城北

今祥符縣西北有浚儀故城即大梁城也

又東左逕倉垣城

在今陳留縣西一名石倉城

又東逕小黃縣

故城北

在今陳留縣東北三十里

又東逕東昏縣故城北

陽武之戶

牖鄉後置東昏縣其故城在今蘭陽縣東北二十里

又東逕濟陽縣故城南

故武父城也在濟水之陽故

又東逕寃胸縣南

今曹

名今在蘭陽縣東五十里

州西南有寃胸故城謂之南濟實濟水之經流也自滎口石

門至此皆禹後代人所道職方豫州之川水經謂

之滎瀆而河濟合焉者也過此則爲陶丘復出之

濟矣以今輿地言之滎澤原武陽武封丘祥符陳

留蘭陽

並屬河南開封府

曹州

屬山東兗州府

諸州縣界中皆滎

瀆之所經也自鴻溝既開滎瀆爲河水所亂已非

其舊逮東漢之世滎澤亦塞而禹迹蕩然無存矣

滎瀆非滎澤也鄭康成云滎澤在滎陽縣東杜預
同京相璠云在縣東南滎澤縣志云在縣南其說
不同按今縣西南十二里有滎陽故城漢縣也昔
時澤在滎陽縣東今則在滎澤縣南矣鄭杜說是
滎澤西北距滎口二十餘里其間必有水道相通
而志家不詳余按水經注黃水自京縣東北流入
滎澤下爲船塘俗謂郟城陂東西四十里南北二
十里穆天子傳曰浮于滎水乃秦廣樂是也北流

注于濟水此皆昔人導澤爲川之路澤水從此北出而爲滎瀆故謂之滎口濟水自敖山又東不得便合滎澤以是知經之澤字當作瀆也

河與滎瀆相亂其來已久而滎澤在西漢時依然無恙故班固云濟水軼出滎陽北地中謂滎澤也至東漢乃塞爲平地不知何故酈道元云昔大禹塞其淫水而於滎陽下引河東南以通淮泗又云大禹塞滎澤開滎蕩渠以通淮泗夫滎澤何以謂

之淫水經曰滎波既豬禹方陂之以蓄其水何以
塞之誕妄不足深辯或云王莽時濟竭而不復出
故滎澤遂塞斯言亦大可疑按司馬彪郡國志河
內温下云濟水出王莽時大旱遂枯絕河南滎陽
下云有鴻溝水而不言滎澤豈以其時已塞爲乎
地乎濟枯之語繫之温縣蓋專謂北源故鄭注於
温縣濟水故瀆下言之然北源東漢復出水經歷
歷可考彪何以直言枯絕而滎澤無文則又似專

指南源此後人所以移其說于滎陽也程大昌云
世惡莽居下流故河徙濟枯皆歸于莽余謂河徙
事見王莽傳無可疑者濟枯亦理之所有但濟水
因旱而枯旱止則當復舊夏季伊洛竭商季河竭
周幽王時三川竭諸水不聞自此遂絕也濟河獨
一枯而不復出且南北二源同此一濟北源復出
南源何以終絕殊不可曉積思久之竟不知滎澤
之塞爲何故頃讀後漢書而得之王景傳云平帝

之世河汴決壞未及得脩汴渠東侵日月侵毀建
武十年陽武令張汜上言河決積久日月侵毀濟
渠所漂數十許縣明帝紀永平十三年詔亦言自
汴渠決敗六十餘歲加頃年以來雨水不時汴渠
東侵日月益甚水門故處皆在河中溝瀆廣溢莫
測圻岸廣韻圻語斤切與垠同當時汴濟之區河災之羨溢
爲害如此濟渠即滎瀆南去滎澤不過二十餘里
則固在所漂數十縣之中者也河水汜濫必至其

處歷六十年而後已填淤之久空實盡空地中伏
流不能上涌滎澤之塞實由於此豈因旱乾而遂
塞哉余闕曰河天下之濁水也水一石率泥數斗
嘗道出梁宋觀決河凡水之所被比其去即穹居
大木盡沒地中漫不見踪跡然則河侵滎澤去後
安得不塞爲平地鉅野縣志云元末河決入鉅野
及徙後澤遂涸爲平陸其明徵也彪得之傳聞不
暇深考故言之不詳世遂附會以爲滎澤墮塞之

故殊非事實余不可以無辯

自滎陽引河後遞加疏導枝津交絡名稱互見使人目眩心搖今綜其大略以菴蕩渠爲主水經注云渠水自河與濟亂流東逕滎澤北東南分濟歷中牟縣之圃田澤與陽武分水又東爲官渡水又東至浚儀縣左則故渠出焉秦始皇二十二年王賁斷故渠引水東南出以灌大梁謂之梁溝世遂目故渠曰陰溝而以梁溝爲菴蕩渠陰溝東南至

大梁城合狼蕩渠其東導者爲汜水

漢志作汴水說文作汜後

人惡反字因改爲汴酈云濟水又兼酈目春秋宣公十二年晉楚戰于郟卽是水也音卞京相璠曰

在敖北

至蒙縣爲獲水又東至彭城縣入泗蕩蕩渠

自大梁城南南流爲鴻溝項羽與漢約中分天下

指是以爲東西之別故蘇秦說魏曰大王之地南

有鴻溝是也鴻溝又兼沙水之目沙水東南流至

新陽縣爲百尺溝注于潁水

漢汝南郡有新陽縣當在今陳州界此

卽班固所謂狼蕩渠首受泝東南至陳入潁者也

其一水自百尺溝分出東南流至義城縣西而南

注淮

義城今懷遠

謂之沙汭左傳昭二十七年楚子常

以舟師及沙汭而還即此也沙水所出又有睢水

渦水睢水自陳留縣首受東南流至下相縣入泗

下相今宿遷

渦水自扶溝縣首受東南流至義城縣南

而東注淮以上諸渠同源於出河之濟

即石門水

故言

鴻溝者則指此爲鴻溝言蕩蕩渠者指此爲蕩蕩

言汴水者指此爲汴水言浚儀渠者指此爲浚儀

渠皆以下流之目追被上源也此外有濟隧上承
河水於卷縣北河南流與出河之濟會自于峇造
八激隄而其流遂斷

東出于陶丘北又東至于荷

傳曰陶丘丘再成正義曰釋丘云再成爲陶丘李巡
云再成其形再重也郭璞云今濟陰定陶城中有陶

丘地理志云定陶縣西

脫南字

有陶丘亭渭按出字義

見上文今山東兗州府定陶縣西南有定陶故城漢

濟陰郡治也陶丘亦在西南去縣七里菏即河澤地
理志濟陰郡下云禹貢菏澤在定陶東唐省定陶入
濟陰故通典濟陰縣下云河澤在縣東北九十里故
定陶城東北今曹州東南二十里與定陶接界處是
也

溢者自中而滿無上源亦無下流頗與阿井相似
出者自下而涌源在地中流在地上如趵突泉之
流而爲灤水濟自此不更伏矣二字大有精義說

者乃謂河水盛滿南溢爲滎而出猶經過之謂如
某將軍出某道之出不亦謬乎

水經注濟水自定陶縣南又東逕秦相魏冉冢南

日知錄云今曹縣有冉冢爲秦相穰侯
魏冉之冢史記穰侯卒于陶因葬焉

又東北逕

定陶恭王陵南又東北逕定陶縣故城南又屈從

縣東北流又東逕陶丘北墨子以爲釜丘竹書紀

年魏襄王十九年薛侯來會于釜丘者也

按漢志
陶丘在

定陶縣西南則濟水當先逕陶丘而後至故城此
經不合恐是錯簡又東北逕定陶縣故城南十字

當在引竹
書語之下

渭按自滎口至陶丘皆後世滎瀆之所
經非禹迹也今曹州定陶界中並有濟水故道禹
時則濟水伏流涌自陶丘之北而東注于荷澤無
上源也陶丘漢志云在定陶縣西南而郭璞言在
城中蓋其時郡徙西南包陶丘而瀉城耳今縣則
又徙于東北故陶丘與漢城皆在西南也

荷澤在陶丘之東北相去不遠濟水伏流至陶丘
北上奮馳波跳沫東北匯于荷澤又東北絕鉅野

至琅槐入海者爲濟瀆其一枝東南流至湖陵入泗者後人目之曰菏水漢志湖陵縣下云北河水在南者是湖陵今爲魚臺縣地也許慎云菏澤水在湖陵謂澤之下流入泗者亦未爲誤自孔傳襲其文曰菏澤在湖陵而遺一水字則在湖陵者爲澤矣釋此至于菏又增一水字曰菏澤之水則定陶之菏澤與湖陵之菏水無別矣酈道元時孔傳已盛行故宗其說言尚書有導菏澤之說自陶丘北

東至于潁水又以湖陵入泗爲澤水所鍾而不知此特潁澤之下流其所鍾則在定陶也且豫州導潁澤被孟豬乃導澤水之餘波南入于孟豬非謂東南至湖陵入泗之潁水酈乃混而爲一種種紕繆皆爲孔傳所誤說禹貢者當以漢志爲正經文三潁字皆以澤言在定陶與湖陵無涉也

潁之爲澤也濟貫其中大半是濟水所匯酈注云即泝水之所包注以成湖澤是也然亦必有旁源

酈注云濟水自定陶故城南又東北右合河水水

上承濟水於濟陽縣東

今蘭陽曹州之間

世謂之五丈溝

又東北出定陶縣北屈左合汜水汜水西分濟瀆

東北逕濟陰郡南又東合于滄又東北逕定陶縣

南又東北右合黃水枝渠而北注濟瀆是汜水與

五丈溝之會于澤者亦皆濟水之分流也寰宇記

云滄水亦名南濟水

近志以北清河爲北濟南清河爲南濟誤由于此

俗

謂之五丈河西自考城縣界來程大昌曰樂史寰

宇書云濟陰有山是爲潁山潁水西自考城來考
城在濟陰西濟之正流未嘗經考城可見潁水自
爲一派而濟來會之甚明也水經以此水爲五丈
溝卽近世命爲五丈河者此正潁水首末也渭按
曹州志潁山在州東南三十里以近潁澤而言蓋
澤本名潁後人因澤以名其山也說者謂潁水出
潁山非是據酈注潁水分濟于定陶東北此卽經
所謂濟水東至乘氏縣西分爲二南爲潁水北爲

濟瀆者也乘氏故城在今鉅野縣西南漢置然曹州之東境亦兼得乘氏地州東南與定陶接界河澤在焉注所謂定陶東北即經所謂乘氏縣西也但不言河澤爲疎漏耳河水只自河澤分流酈以濟陽所出之五丈溝爲河水蓋雜採它說而有此繆元和志因目魚臺之河水曰五丈溝而程氏據以爲河水之首末正當如此皆非地志水經之河水起乘氏訖湖陵之本意也

濟水有三伏三見之說或謂出于近世之俗學殊不可信王綱振云如時以東流爲濟溢爲滎爲見則滎東流爲漢匯爲彭蠡亦可爲見乎又若以入于河爲伏則渭入于河洛入于河亦可爲伏乎況經明言浮于濟漂達于河河濟本通而此曰流曰溢曰入曰出曰至曰會亦並無間斷不知三伏三見何據但沿襲既久爲之曲解非本注也渭按伏見之說二孔無之然有所自來秦澤一伏東丘一

見本水經注武德入河再伏滎陽軼出再見本地
理志滎東又泐爲三伏出曹濮間爲三見本唐書
許敬宗傳此豈創自近世但以入河爲伏羲有未
安耳滎澤自周以前已導爲滎川與陶丘復出之
濟相接故漢志于軼出滎陽地中下即繼之曰又
東至琅槐入海而定陶縣下亦止云禹貢陶丘在
西南不引東出之文蓋三見之迹不可得見久矣
鴻溝既開滎瀆爲濁河所亂陶丘之實日就填淤

而滎澤之澄泓如故其後滎澤亦塞則河南由是
無濟水而再見之迹亦亡水經以河濟合流分入
滎瀆者爲濟水京相璠謂之出河之濟酈道元宗
之而班固之所謂軼出地中者絕口不談矣或以
爲河中截流而過孔安國或以爲河底穴地而來蔡沈
或以爲河濟相亂南出還清孔穎達或以爲適會河
滿溢出南岸程大昌各持所見終非定論余竊謂河
南之濟即奮自河南之地中未必與入河之濟爲

一脈譬如人之鼻息總出丹田氣海中呼者豈必其吸者之復出邪沈括云歷下凡發地皆是流水世傳濟水經過其下東阿之井乃濟水所爲曾鞏云泰山諸谷之水自渴馬崖潛流地中至歷城西復出焉趵突旁溢十數泉蔡傳引以證濟之伏見重源顯發所在多有元和志云鄭州管城縣京水出縣南平地新鄭縣溱水出縣西北三十里平地二處並在河南密邇滎澤尤爲明驗蓋濟瀆所經

之地其下皆有伏流遇空竇即便涌出故一見于
滎澤再見于陶丘不必以入河之濟爲上源亦不
必并泰澤東丘數之爲三伏三見也草廬之說雖
聖人復作無以易之矣

東坡惠泉詩云茲山定空中
乳水滿其腹遇隙則發

見臭味實一族余謂濟水亦
然今年遊歷下觀諸泉尤信

又東北會于汶

傳曰濟與汶合渭按地理志汶水出泰山萊蕪縣西
南入濟詳見青州

水經注濟水自定陶縣東北又東至乘氏縣西左傳

僖公三十一年分曹地東傅于

濟濟水自是東北流出巨澤

分爲二南爲潁水

北爲濟瀆

其一水東南流其一水從縣東北流入巨澤澤按北濟自滎澤東逕卷縣之武

修亭又東逕陽武縣故城北又東逕酸棗縣之烏

巢澤北又東逕平丘縣南又東逕濟陽縣故城北

又東北逕寬胸縣故城北又東北逕呂都縣故城

南又東北逕定陶縣故城北又東北與濮水會濮

水上承瀆水于封丘縣關駟曰首受別濟即北濟

也濮水故瀆東北流至乘氏縣合北濟與濟水同

入鉅濟水故瀆又北右合洪水水上承鉅野薛訓

野逕關鄉城西又北與濟瀆合自渚迄于北口一百

二十里名曰洪水桓温以太和四年率衆北入掘

溝通濟故自洪口已上又謂之桓公潰濟自是北注也 又東北過壽張縣西

界安民亭南汶水從東北來注之

今東平州西南有壽張故城西

北去今壽張縣五十里州西南十里有安山鎮即古安民亭齊乘云東平城西即安山閘閘下泥河口有亭子店即安民亭遺址濟沒合處 戴延之所謂清口也郭緣生

迷征記曰清河首受洪水北流濟或謂清則濟也 禹貢濟東北會于汶今枯渠注巨澤巨澤北則清口清水與汶會也渭按濟水自荷澤東北流絕鉅野澤而北合洪水以至安民亭南者禹之舊迹也

其後不知何年改從澤西之清水而繞澤北以會

汶謂之清口其澤中之道自洪口至清口者則無

水故水經謂之故瀆逖征記謂之枯渠

漢元光中河決瓠子

東南注于鉅野濟水

改道疑當在此時

今會通河逕鉅野縣東北七

十里去故城已遠并清水會汶之故道亦湮沒而

不可考況禹之舊迹乎

又北東入于海

傳曰北折而東茅氏曰秦繼宗云又東北會于汶當

於東字一讀又北東入于海當於北字一讀渭按地理志濟水自滎陽東至琅槐入海過郡九行千八百四十里今青州府樂安縣東北一百十里有琅槐故城漢縣屬千乘郡也

水經注濟水自壽張縣西合汶水又北逕梁山東

袁宏北征賦曰背梁山截汶波即此處也

梁山括地志云

在鄆州壽張縣南二十五里今在東平州西南五十里接汶上縣界梁山灤在今壽張縣東梁山之南濟汶既合東北匯而成灤日知錄云五代史晉開運元年滑州河決浸汴曹濮單鄆五州之境環

梁山合于汶水與南旺蜀山湖連瀾漫數百里宋史宦者傳梁山濼古鉅野澤綿亘數百里濟鄆數州賴其蒲魚之利金史食貨志黃河已移故道梁山濼水退地甚廣遣使安置屯田自此以後鉅野壽張諸邑古時潄水之地無尺寸不耕而忘其昔日之爲川浸矣

又東逕須朐城

西

城臨側濟水故須朐國安民亭北對安民山東臨濟水水東即無鹽縣界按東平州本漢無鹽

縣州西南有須朐故城

又北逕微鄉東

春秋莊公二十八年冬築鄆公羊傳謂之

微在東平壽張縣西北三十里濟水又北分爲二枝津西北出謂之馬頰水

又北逕須

昌縣西

今東平州西有須昌故城元和志須昌縣濟水在縣西二里

又北逕魚

山東左合馬頰水

水首受濟西北流歷安民山北又逕桃城東又東北逕魚山南

山即吾山 瓠子歌所謂吾山平者也其水又東注于清濟謂之馬頰口元和志魚山在東阿縣東南二十里近志云在縣西以宋初縣治東移故也 又北逕清亭東春秋隱公四年公及

宋公遇于清京相璠曰今東阿縣東北四十里有故清亭即清也濟水於是通得清之目燕王曰齊有清濟謂此水也按春秋莊公三十年公及齊侯遇于魯濟杜預曰濟水歷齊魯界在齊界為齊濟

在魯界為魯濟濟水自清亭又北則為穀城齊地矣濟之為齊為魯當分于此間也 又北逕穀城縣西濟水側岸有尹卯壘南去魚山四十餘里是穀城縣界縣有穀城山陽穀之地

春秋齊侯宋公會于陽穀者也按後漢分東阿置穀城縣今為東阿縣治 又北逕周首亭西左傳齊襄公二年王子成父獲長狄榮如埋其首于周首之門是也今世謂之盧子城濟

北郡治也。又北逕臨邑縣東。縣有濟水祠。水有石門。故

年齊鄭會于石門。鄭車傭濟。即于此也。按通典漢臨邑故城在盧縣東。今爲莊平縣地。又北

逕平陰城西。春秋襄公十八年。晉侯沈玉濟河。會于魯濟。同伐齊。齊侯禦諸平陰者也。

京相璠曰。平陰在濟北盧縣故城西南十里。今爲平陰縣地。又東北逕垣菑城

西。故洛當城。伏滔北征記曰。濟水又與清河合流。至洛當者也。今在長清縣西南。元和志長清縣

濟水在北。去縣十里。即今大清河也。對岸則齊河縣。大清橋跨其上。爲南北通衢。又東北

逕盧縣北。按左傳。隱三年。齊鄭尋盧之盟。即此。又逕盧縣故城北。濟

郡治也。元和志。盧縣。濟水在縣東二里。臨邑縣。濟水西去縣四十里。又東北與中

川水合

水東南出山莊縣北流逕盧縣故城北入濟俗謂之沙溝水按山莊故城在今長清

縣東北元和志豐齊縣濟水東去縣二十里豐齊屬齊州故山莊天寶二年改名又東北

右會玉水

水導源泰山朗公谷西北流逕祝阿縣故城東而北注于濟按祝阿故城亦在

長清縣東北

又東北灤水出焉

水出歷城縣故城西南泉源上奮水湧若輪春

秋公會齊侯于灤是也其水北流注于濟謂之灤口灤音洛寰宇記灤水在歷城西南二百步元和

志全節縣濟水在縣北四十里按今濟南府治歷城縣東有東平陵故城漢縣唐貞觀中改名全節

屬齊州曾鞏齊州二堂記曰泰山之北與齊東南諸谷之水西北合于黑水之灣又西北會于柏崖

之灣而至于渴馬之崖蓋水之來也衆其北折而西也悍疾尤甚及至于崖下則泊然而止而自崖

以北至于歷城之西蓋五十里而有泉涌出高或至數尺其旁之人名之曰趵突之泉齊人皆謂嘗有棄糠于黑水之灣者而見之于此蓋泉自渴馬之崖潛流地中而至此復出也其注而北則謂之灤水達于清河以入于海舟之通于濟者皆于是乎達也齊多甘泉其顯名者十數而色味皆同以余驗之蓋皆灤水之旁出者也齊乘曰今府城西平地泉源感涌聲如隱雷旁合馬跑金線諸泉周可數故北出又合蜜脂五龍象泉並城北流屈而東至城北水門大明湖水出注也又曰濟南名泉碑論七十二泉遠至中宮靈巖諸泉具載而並不注之並泉明水鎮之明泉皆失不取況其名亦未雅稱蓋殘

又東北逕華不注山

單椒秀澤不緣丘陵以自高青崖翠

發望同點黛山下有華泉左傳成二年蓋之戰晉人逐齊師三周華不注齊侯及華泉驂絀于木而

止即華水也北絕聽瀆二十里入于濟元和志華不注一名華山在歷城縣東北十五里不讀如字

又東北逕臺縣北

今歷城縣東北有臺縣故城

又東北逕管縣

故城南右納百脈水

今章丘縣西北有管縣故城隋改置臨濟唐屬齊州百脈

水出土鼓縣故城西源方百步百泉俱出西北流注于濟元和志臨濟縣濟水在縣南二十里章丘縣濟水在縣西去縣十七里舊志云小清河在章丘縣北三十里

又東逕梁鄒縣

北元和志濟陽縣濟水在縣南長山縣濟水在西北去縣三十五里鄒平縣濟水在北去縣三十

五里按梁鄒故城唐置濟陽縣屬淄州今爲鄒平縣治其唐之鄒平縣城則割入今齊東縣界金志長山新城二縣西北並有小清河新城本漢高苑其故城在今縣東

又東北逕臨濟

縣南

今高苑城西南有臨濟故城元和志高苑縣濟水在北去縣七十步宋史乾德四年清河

水溢壞高苑縣

又東北迤爲淵渚謂之平州

應劭曰博

城溺數百家

昌縣西南三十里有安平亭故縣也世尚有平州之名矣按今高苑縣東南十里有麻大泊一名魚

龍灣周五六十里蓋即

又東逕高昌縣故城西

今在

古濟水所匯之平州也

博興縣

又東逕薄姑城北

城在臨菑縣西北五十里近濟水今博興縣東

北蒲姑城是也

又東逕狼牙固西

其地無考

又東北逕利縣西

晏謨曰縣在齊城北五十里今博興縣東有利縣故城

又東北逕樂安縣故

城南

樂安故城在今博興縣東北隋改樂安曰博昌五代唐改曰博興元和志博昌縣濟水在

北去縣百步渭按此經舊在高昌下今據薄姑利
縣俱南直臨淄而樂安故城在博昌縣東北則此
經乃錯簡故移置利
縣之後甲下之前 又東北至甲下邑南東歷琅

槐縣故城北

地理風俗記曰博昌東北八十里有
琅槐鄉故縣也山海經曰濟水絕鉅

野注渤海入齊
琅槐東北者也

又東北河水枝津注之

水經以瀉
入河非也

斯乃河水注
濟非濟入河

又東北入海

渤海在今樂安縣東北
一百三十里東接壽光

縣界北接利津縣界樂安本漢廣饒鉅定二縣屬
齊郡其故城並在今縣東北後漢省琅槐入博昌
故杜預郭璞皆言
濟水至博昌入海以今輿地言之自東平會汶以

下東阿平陰

並屬山東
兗州府

長清齊河歷城章丘鄒平

長山新城

並屬濟南府

高苑博興樂安

並屬青州府

諸縣界

中皆禹貢濟水入海之所經也

濟水自東平以下唐人謂之清河按戰國策燕王謂蘇代曰齊有清濟濁河以爲固郭緣生曰清河首受洪水北流濟或謂清則濟也酈道元曰濟水通得清之目亦水色清深用兼厥稱矣此清河之名所自來也至宋又有南北清河之名河渠志云熙寧十年河決澶州徙而南東匯于梁山張澤灤

分爲二派一合南清河入于淮一合北清河入于
海南清河即泗水北清河即濟瀆也南渡後北清
河又有大小之分蓋自劉豫導濼東行始齊乘以
大清河爲古濟水小清河爲豫所創志家皆沿其
說黃子鴻非之曰以水經注元和志寰宇記諸書
考之濟水最南濼水在中河水最北今者小清所
經自歷城以東如章丘鄒平長山新城高苑博興
樂安諸縣皆古濟水所行而大清所經自歷城以

上至東阿固皆濟水故道而自歷城東北如濟陽
齊東青城諸縣則皆古漯水所行蒲臺以北則故
河水所經蓋宋時河嘗行漯川及河去則大清兼
行河漯二川其小清所行則斷爲濟水故道也渭
按子鴻此言正三百餘年積傳之謬蓋清河所行
本濟瀆不知何時從歷城東北決而北入濟陽縣
界與漯水合而清河之名遂被于漯據水經漯水
逕著縣故城南著即今濟陽而縣南有大清河是

知大清即漯其水自歷城入濟陽乃近世之所決
非唐清河入海之故道也濟陽之流日盛則章丘

之流日微故劉豫堰漯水使東以益之

齊乘云大清河自齊

河縣又北經歷城上灤橋北灤水分響河入焉又東北逕華不注山陰又東逕下灤堰漯水昔入濟處堰南即小清河按響河即聽水也此大清河猶是濟之故瀆

其所行者實濟水

故道而志家反以濟陽之大清河爲古濟舛錯殊

甚不有子鴻其誰正之然大清自歷城入濟陽及

濱州以東入海之道不知決于何年意者宋熙寧

時河嘗合北清河入海始開此道其後金明昌五
年河復由此入海久而後去流益深廣此大清之
所以浩浩而小清之所以屢濬屢塞也與

水經叙濟水自滎陽以下原委甚悉杜預春秋釋
例曰濟自滎陽卷縣東經陳留至濟陰北經高平
東經濟北東北經濟南至樂安博昌縣入海郭璞
注山海經略同酈道元依水經以立注出河之濟
又如詳焉是由東漢以迄後魏濟未嘗一日絕也

唐人則據司馬彪之言以爲自王莽後河南不復有濟水太子賢注後漢循吏傳曰濟水東流逕溫縣入河度河東南入鄭州又東入滑曹鄆濟青等州入海王莽末旱則枯涸但入河內而已杜佑通典曰濟水因王莽末旱渠涸不復截河過今東平濟南淄川北海界中有水流入于海謂之清河實北河澤汶水合流而曰濟河蓋因舊名非本濟水也李吉甫元和郡縣志曰濟水自王莽末入河同流

于海知河南之地無濟水矣自後所說皆襲舊名
如鄆州之須昌濟州之長清盧縣齊州之臨邑豐
齊全節臨濟章丘淄州之濟陽長山鄒平高苑青
州之博昌諸縣界中並有濟水其後則不經博昌
而改從棗州之蒲臺入海是皆襲舊名而實非濟
也渭按鴻溝既開河水與滎濟相亂及滎澤塞爲
平地則河南無涓滴之濟矣水經之所謂濟者皆
滎陽下所引之河水也而杜預京相璠郭璞酈道

元輩皆莫能辨唐人始知之所見遠過于前但以
爲河南之濟由王莽末旱枯而絕則非以余考之
旱枯之事郡國志繫河內温下酈注亦於温縣濟
水故瀆下言之其所云枯後復通津渠勢改者謂
濟水自温縣入河不復東至武德耳而滎陽以下
絕無一字道及殆與河南之濟無涉詳見前釋例自
卷縣博昌而外略舉郡名故與水經不同孔穎達
以爲水流之道今古或殊杜據當時所見言之與

水經乖異非也晉時濟水之道實與漢世不殊文
有詳略非枯後復通津渠勢改也若夫唐之清河
自須昌以下所受唯荷汶則又有其故矣蓋天寶
之後汴水堙廢濟渠亦無所受荷澤以西竟成斷
港故元和志言濟自須昌始而通典云濟河實荷
汶之合流其所謂荷者即五丈溝之水西自考城
來者也迨元人開會通河引汶絕濟以資運道明
永樂中又于古四汶口之地築戴村壩遏汶使西

南流

汶水自是盡出于汶上西南至南旺入漕四分南流出上閘接沂泗六分北流出下閘抵

漳

衛唯小鹽河一綫洩入清河

小鹽河在今東阿縣西南二十里即運河

所洩汶水支流也

清河賴諸山泉溝澤以成其川并無滄

汶之可言矣而志家猶執清河以爲禹貢之濟水不亦過乎或又云山左諸泉實皆濟水溢爲大小清河濟雖絕而不絕也然此等指爲濟水則可以爲滎澤陶丘之遺跡可乎哉東漢後河南無濟水斯爲定論紛紛筆舌徒滋來學之惑無爲也

杜佑之譏水經也曰按後漢郡國志因王莽末旱
此渠枯涸濟水但入河而已不復截河而南水經
是和帝之後所撰乃云南過滎陽武封丘寃胸
乘氏等縣並今縣地一依尚書禹貢舊道斯不詳
之甚酈道元又從而注之其所纂叙及注解並大
紕繆洵按河北之濟因旱而枯旱止則復出河南
之濟焉濁河所侵空曠盡空河去不復能上涌故
遂絕自東漢以迄唐初凡行濟瀆者皆河水也而

猶目之曰濟是鵲巢而鳩居觚名而圜實也故杜氏力詆水經以爲不可信然滎濟故道猶可因是而得其十之七八則此書不無補焉黃文叔云濟水雖絕其瀆猶在雖中間經穿鑿變易或斷或續然水之附入於其瀆者猶可尋求緝之以存禹迹非無理也斯言蓋得其平

濟瀆之水自周以來凡數變初爲濟及導滎爲川則滎與濟合鴻溝既開滎瀆爲河所亂及滎澤又

塞則所行者唯河水矣汴渠不通則鉅野以北所
行唯荷汶戴村已築則東阿以下所行唯山泉溝
澤之水其號爲濟者龔舊名而已濟瀆入海之道
自唐以來亦數變初經高苑縣北又東北至博昌
入海其後則不由博昌通典云舊濟合在今博昌
縣界今無元和志蒲臺縣下云海在縣東一百四
十里海畔有一沙阜俗呼爲關口淀是濟水入河
之處海潮與濟相觸故名蓋其時濟水改道從蒲

臺東北與河渾濤而入海也宋南渡後劉豫導樂
水東行入濟水故道爲小清河仍經高苑縣北至
樂安縣入海及金皇統中縣令高通改由縣南長
沙溝至博興合時水又東北至樂安由馬車瀆入
海瀆在縣東北五十里今爲高家港其後小清之上流堙塞鄒平
長沙新城界中故瀆皆爲漯河所行漯河即楊渚
溝水寰宇記所稱獺河者也歷城新志云小清河
自明永樂以後漸至堙塞成化九年嘗濬治之嘉

靖十二年又塞乃復濬博興以西達於歷城幾三百里久之復淤蓋小清唯恃灤水爲源堰東有阻則灤水仍自華不注東北入大清河屢濬屢塞職是故也水經所敘瀆同而水異水異故李弘憲云河南無濟水瀆同故黃文叔云禹迹賴此而猶存言非一端各有所當今與人論濟水苟以爲無則羣指七十二泉大小清河以相難若以爲有則又據杜佑之說詆水經不當襲舊名爲濟明道謂與

公言如扶醉人扶得一邊起又倒却一邊真可笑
又可憎也

禹貢錐指卷十五